

ପ୍ରଥମ ପ୍ରକାଶ : ନବବର୍ଷ ୧୩୭୭

ପ୍ରଚ୍ଛଦ : ପୁର୍ଣ୍ଣେନ୍ଦୁ ମଜୁ

ପ୍ରକାଶକ : ସ୍ୱାଧୀନଶେଷର ଦେ । ଦେ'ଜ ପାବଲିଶିଂ
୧୩ ବକ୍ସିମ ଚ୍ୟାଟାର୍ଜି ଷ୍ଟିଟ । କଲକାତା ୧୦୦ ୦୧୩

ମୁଦ୍ରାକର : ଶିବନାଥ ମାଲ । ପ୍ରିଣ୍ଟେକ
୨ ଗଣେନ୍ଦ୍ର ମିତ୍ର ଲେନ ! କଲକାତା ୧୦୦ ୦୦୫

নরেন্দ্র দেব ও শ্রীমতী রাধারানী দেবী
আমার কবি মা-বাবাকে

এই লেখকের :

আমি, অনুপম (উপন্যাস) ২০০০

নিবেদন

এখানে রইল তিরিশ বছরের কবিতার টুকরো। এতদিন ছেদহীনভাবে কবিতা প্রকাশিত হলেও ১৯৭১-এর পরে আমার কোনো কাব্যগ্রন্থ প্রকাশিত হয়নি, শুধু গদ্যগ্রন্থই বেরিয়েছে। সেজ্ঞা এখানে বই থেকে চম্বিত ও অগ্রস্থিত কবিতা সংখ্যায় প্রায় সমান। তিনভাগে কবিতাগুলিকে সাজানো হয়েছে। প্রথমভাগে আছে ১৯৫৭-৫৯-এ লেখা, ১৯৫৯-এ প্রকাশিত আমার প্রথম কাব্যগ্রন্থ 'প্রথম প্রত্যয়' থেকে নেওয়া কবিতা, দ্বিতীয়ভাগে ১৯৫৯-৭১-এ লেখা, ১৯৭১-এ প্রকাশিত আমার দ্বিতীয় কবিতার বই 'স্বাগত দেবদূত'-এর কিছু কবিতা, আর তৃতীয়াংশে সবই অগ্রস্থিত (কিন্তু প্রকাশিত) কবিতা। 'রক্তে আমি রাজপুত্র' নামে একটি বই বেরনোর কথা ছিল ১৯৭৫ নাগাদ, আমারই আলশ্রো বের হতে পারেনি। তার কবিতাও এই অংশে অন্তর্ভুক্ত। এই তৃতীয়ভাগে ১৯৭২-৮৮ পর্যন্ত প্রকাশিত কবিতার কিছু সন্নিবেশিত হলো। তৃতীয়াংশের শেষার্ধ্বে কিন্তু কালানুক্রম বজায় রাখা সম্ভব হয়নি। মাঝে কিছু কবিতা খীম অনুযায়ী গেছে, এবং শেষের দিকে কিছু সত্তরের দশকের কবিতা আছে। তর্জমা কবিতা একটিও রাখা হলো না। কবিতাগুলিকে 'শ্রেষ্ঠ' বলতে যার পর নাই কৃণা বোধ করছি; নির্বাচনও ভেবেচিন্তে করিনি তেমন, নেহাৎই তাড়াছড়োয় সাজানো। একটি কবিতা লিখতে আমার বছরদিন সময় লাগে, তার বেলা তাড়াছড়ো করি না বটে, কিন্তু পাণ্ডুলিপি প্রস্তুতিতে অমনোযোগ আমার স্বভাবসিদ্ধ। এখানে পাঠকের ক্ষমা ও প্রস্রয়ের প্রার্থী। স্নেহাস্পদ বন্ধু শ্রীষপন মজুমদারের উদ্যোগেই এ বইটির প্রকাশ ঘটল। যারা বাংলা কবিতা ভালোবাসেন, তাঁদের ভালো লাগলে, এই প্রকাশ সার্থক।

“ভালো-বাসা”

নবনীতা দেবসেন

৭২ হিন্দুস্থান পার্ক

কলকাতা ৭০০ ০২৯

নবনীতা দেবসেনের
শ্রেষ্ঠ কবিতা

আরোগ্য

শুধু তুমি স্বস্থ হবে ।

আমি দিয়ে দেবো আমার কোজাগরীর চাঁদ,
শাদা দেয়ালের ময়ূরকণী আলো,
দিয়ে দেবো বিগত বছরের মরা পাখির মমতা,
আর আগামী বছরের কলাগাছটির স্বপ্ন ।

চ'লে যেতে যেতে সবাই তো তাই ব'লে গেলো ।

কুন্তী নদীর গেরুয়া জল তার সবুজ ছায়া-কাঁপা ঠাণ্ডা গলায়
আমাকে বলেছে,
শুকনো সোনালি গোকুর গাড়িগুলো
ক্লান্ত কাদাটে গলায় আমাকে বলেছে,
শেষ হেমন্তের বুড়ো সবুজ পাতারা
আসন্ন মৃত্যুর খসখসে গলাতে বলেছে

তুমি স্বস্থ হ'লেই ওরা আবার ফিরবে ।

এমন কি

তুলসীতলার যে-প্রদীপটি ধ'রে তুমি
আমার মুখ দেখেছো, তাকেও ভাসিয়ে দিয়ে,
একটি শুভ্র স্তব হ'য়ে জলবো তোমার শিয়রে
আসুক, ওরা ফিরে আসুক, যারা চিরকাল
শুধুই চ'লে যাচ্ছে, এখান থেকে অত্থানে
উৎপাটিত একগুচ্ছ কচি সবুজ দ্বার মতো
তুচ্ছ, উষ্ণ, কাতর
আমি তোমার যন্ত্রণা মুছে নেবো :
তার বদলে, ঈশ্বর, তার বদলে আসুক
তোমার কাজিক্ত আরোগ্য ॥

মিথ্যে

আমি জিজ্ঞেস করলুম, আয়না তুমি কার, পারুল তুমি কার, ইচ্ছে তুমি কার ।
ওরা বললে, কেন, তোমার । আমি বললুম, কখনও না । ওরা হাসলো ।
আবার বললুম, আয়না তুমি কার, পারুল তুমি কার, ইচ্ছে তুমি কার । ওরা
বললে, শুধু তোমার । আমি বললুম, বিশ্বাস করি না । ওরা কাঁদলো ।
যেদিন ডাকলুম, আয়না তুমি আমার, পারুল তুমি আমার, ইচ্ছে তুমি
আমার,—সেদিন রূপোলী ঝড় গোঁ-গোঁ ক’রে রেগে বললে, মিথ্যে কথা ।
আমি বললুম, না, না—ঝড় বললে, মিথ্যে কথা । আমি কাঁদলুম, আমার,
আমার । ওরা সাড়া দিলো না ।
রূপোলী ঝড় হা-হা ক’রে হেসে ব’লে গেলো, মিথ্যেবাদী ॥

পূর্ণিমা

দেখেছি গঙ্গায় আমি ব্যর্থ এক চাঁদ ডুবে যেতে ।
যদিও বজরা ভ’রে প্রেমিকের কল্লোল খনিত
তারাদের নাভিখাস, সকালের আলোর গুঞ্জন
সব ধ্বনি গ্রাস ক’রে চাঁদ শুধু শব্দময় হ’লো ।

সারারাত্রি সারারাত আকাশের বিলোল প্রাসাদে
স্বপ্নচারী শুভ্রচাঁদ সময়ের সঙ্গীত শুনেছে
তারপর তমোহীন স্বপ্নহীন পরিচ্ছন্ন ভোরে
অকস্মাৎ আত্মজট্টা বীতশ্মুহ সন্ন্যাসীর মতো

অহুদিগ্ন পূর্ণচাঁদ শূন্যহাতে নেমে গেলো জলে ।

ঋতু

তোমাকে জড়াতে চাই ঋতুর কোতুকে,
এ-কোলে ও-কোলে তুলে রাখি,
খানিক বিভ্রান্ত হও, সন্দিহান স্বপ্নে—
তবুও, পুরোটা নয় ফাঁকি ।

কপট পাশার জুড়ি না-হয় হ'লেই,
খেলুড়ি তুমি কি কিছু কম ?
কৌশল তোমারও জানা, কেবল যা নেই
তা হ'লো, আমার সংঘম ।

যখন সংসারে ভোর পাখির কৃজনে
তখন ঘরের দোর খুলে
না-হয় ভেসেই গেলো আবর্তে দু'জনে
মন্দির, ক্ষেতের কথা ভুলে !

তবুও আকাশে বর্ষা, সমুদ্রে ও মাঠে
ভাবানুঘঙ্গের দায় ঋতুর চৌকাঠে ॥

অজাত প্রেম

কোনো ছরস্তু সম্মান দিয়ে তাকে
অমন দু'হাতে জড়াতে চেয়ে না, মন—
মাঠের শস্য বোনা ও তোলায় ফাঁকে
কাটাতেই হবে অনেক, অনেক ক্ষণ ।

কোনো বাসন্তী অভিমান দিয়ে ঘিরে
কপট কলার আলপনা আঁকা ছাড়ো
কথা-ফুলে-গাঁথা তীক্ষ্ণ গোপন তীরে
মিথ্যেই তাকে বিদ্ধ করো না আরো ।

সে আজো আকাশ, সে আজো সাগর, পাখি—
তবু কি চেনোনি চোখে গভির্গী ভাষা
ভূমিষ্ঠ হ'তে হয়তো অনেক বাকি
অবৈধ হ'য়ে হত্যা কোরো না আশা ।

রেখা

একান্ত স্বপ্নের স্বর, স্মৃতি—
শঙ্খশাদা, অথচ গোপন
কৃষ্ণা চতুর্দশী হোক তিথি
রবীন্দ্রসংগীত হ'লো মন ।

সমুদ্রে বলিষ্ঠ বাহু মেশে
তেপান্তরে স্ফোঁল চিবুক
সরীসৃপ প্রতিজ্ঞারা এসে
পুষ্পে ঢাকে নিয়তির বুক ।

ঘটনা বিস্তারে অভিনব
হৃদয়ে তো সেই চিরন্তন
মধ্যরাতে অমৃতসম্ভব
পূর্ণ কোনো নিভৃত মরণ ।

শেষ অঙ্ক

অন্ধকার অমাবস্যা হ'য়ে
সে এসে দাঁড়ায় মন ঢেকে
যন্ত্রণার তারা ছুঁয়ে ছুঁয়ে
নয়নে চরণরেণু রেখে ।

ভবু বলি, মিনতি আমার
এখনি যেয়ো না, যদি এলে—
দেউলে আগুন জলে যার,
না-হয় শেষাক্ষ দেখে গেলে ।

সোনার হরিণের ছড়া
সোনার হরিণ হারালে হারাবো
কী আর করা ।
বৃষ্টি বারে না কতকাল, শুধু
শুকনো ধরা ।
স্বতন্ত্র নদী শুকিয়ে হ'লো কি
বালির চড়া ।
সোনার হরিণ সোনার হরিণ
হীরের চোখ ।
ঝরক বৃষ্টি সোনালি ধানের
ফসল হোক ।
হীরের বৃষ্টি সোনার ফসলে
ঝড়ের নখ ।

সোনার হরিণ হারালে কি চলে—
ক্লান্ত মাটি
বৃষ্টির মুখ চেয়ে বসে আছে
ধানচারটি ।

নদীর হাওয়া

অন্ধকারে বৃষ্টি পড়েছিলো
গাড়ির কাছে নৃত্যপর ছায়া
নদীর হাওয়া হঠাৎ ছুঁয়ে দিলো
চিত্তে কাঁপে গোপন অশনায়ী...
অনেক দূর অনেক দূরে বাড়ি
পিচের পথ বৃষ্টি-ভেজা নদী
অনুত্তর অন্তহীন পাড়ি
অন্ধকার ঝরলো নিরবধি ।
বারংবার কথার খোঁজে ঘুরে
ক্লান্ত স্নায়ু, আঙুন, শাদা ধোঁয়া,
গন্ধ এলো জানলা দিয়ে উড়ে
মাটির, কাঁদা, ঘাসের ভিজে ছোঁয়া...
বৃষ্টি নাচে ব্যর্থ সমারোহে
জগৎ চেরে বিদ্যুতের ফলা
ঘণ্টা বাজে বাক্যহারি দেহে
অন্ধকারে অন্তহীন চলা...

এবং সেই যাত্রা থেমে গেলে
অন্ধকার উড়লো ডানা মেলে
স্বর্ঘ-বৈধা ধু-ধু বালির চরে
নদীর হাওয়া কাঁদে হলুদ ঝড়ে ।

বৃত্তহীন একটি গোলাপ

কিন্তু, তুমি এখন তো জানো
বর্ণ গন্ধ ফুলের জঞ্জালে
বুক রেখে কিংবা মুখ রেখে
কোনো লাভ নেই ।

জেনেছো তো কী ক'রে এসব
সহজেই স্পষ্ট মুছে যায়
হাওয়া, বৃষ্টি, মেঘে
বসন্তের সোচ্চার প্রার্থনা
কী ক'রে ফোটায়
শরতের ক্লান্ত শাদা ফুল ।

সব চোখ দূরে রেখে এইবার তবে
আদিগন্ত প্রান্তরে দাঁড়াও ।
তোমারই উদ্দেশ্যে জন্ম নিক
বর্ণে গন্ধে তীব্র রাজকীয়
বৃন্তহীন একটি গোলাপ ।

মাথুর

[বকুলের বুকের ওপর
বারবার হাওয়া বয়, তবু
বসন্তের আকাশ পাথর ।]

বসন্তে কে আর ফিরে আসে
নিসর্গের বৃন্দাদৃতী ছাড়া
সব নদী মিলায় আকাশে ।

বরং পাখিরা উড়ে গেলে
ছলুরব করুক বধূরা
রাধা-অঙ্ক তমালের ডালে —

অভিষেক-উত্তপ্ত মথুরা ।

প্রথম প্রত্যয়

বৃষ্টিতে ওড়ালো পর্দা,
পর্দা ওড়ে, শ্রাবণ-সকাল
সব দরজা খুলে যায় পিছনের পথে
শুকনো পাতা ভিজে,
পদচিহ্ন ঢেকেছে শৈবাল ।

বৃষ্টিতে পেতেছি মুখ,
সিক্ত কেশে ঢেকেছি শরীর
এবার উপরে চোখ তুলে
প্রথম প্রত্যয়ে বলি
অসংকোচ নির্ভার আলোয় :
—সব গেছি ভুলে ।

তরু

যদি সেই মহামহিমায়
যা কিছু সকলি জেগে থাকে
তবে সেই প্রথম হৃদয়
জুড়োলো নদীর কোন্ বঁাকে ?

কিছু নীল, সবুজ, গভীর
সময়ের দূর সরোবর
বালিহাঁস, গাঢ় লাল তীর.
তৃষিত সোনার বালুচর...

তারপর কাচের পুকুরে
লাল নীল বেগুনী হলুদ
শফরি সলীল, বেকসুরে
শোধ করে জীবনের স্মৃতি ।

যদি সেই মহামহিমায়
সব শিখা চিরকাল জাগে
তবে সেই প্রথম হৃদয়
আবারও জনুক সংরাগে

কোথাও রয়েছে সেই তরু
যা কিছু সকলি বুকে নিয়ে
ব্যর্থ ক'রে নির্বেদের মরু
নিয়ে যাবো মুকুল কুড়িয়ে ।

দ্বন্দ্ব

একবার আমার দিকে চোখ তুলে তাকাও
আমি তোমার চোখের মধ্যে একটু হাসি ।
সে-হাসির আদরে তোমার চোখ কাঁপুক
তোমার চোখ কাঁপুক
তোমার চোখ লাঞ্ছক
আমি কাঁপি আমি কাঁদি আমি দাঁড়াই ।
তোমারই মতো একা, ব্যাপ্ত
সহস্রাক্ষ সহস্রবাহু
অনাদি অনন্ত অঙ্গর
নিজের অস্তিত্ব নিয়ে অলুক্ষণ লীলায়িত
আমি
তোমার আশ্চর্য অনিবার্য সঙ্গী ।

ওপরে ফাঁকা নীচে ফাঁকা সামনে ফাঁকা পিছনে ফাঁকা
সময় যখন আপনি ফাঁকি দেয়
সেই তো ইচ্ছার লগ্ন ।
আমি এসেছি তুমিও এইবার এগিয়ে আসবে

রাগ কোরো না ত্যাগ কোরো না আশা কোরো না, শুধু তাকাও
 আমার নির্মল আকাশে তোমার সোনালী রোদ্র
 ভয় কোরো না জয় কোরো না ছলা কোরো না, শুধু তাকাও
 তোমারই মতো উজ্জল আর নির্ভুর, দর্পিত আর মায়াবী,
 পবিত্র আর করুণ আঁখির অরণ্যে
 শ্রাবণের বৃষ্টির মতো তাকাও
 ভৈরবী স্বপ্নের মতো
 বৈরাগী মৃত্যুর মতো
 নিশ্চিত
 আর মনে করে। তুমি আমার জন্মে
 বৃষ্টি আমার জন্মে, বকুল আমার জন্মে, শস্য আমার জন্মে
 মনে করে।, দুঃস্বপ্ন আমার, নৈবেদ্য আমার, চৈতন্য আমার
 আর তখন আমি তোমার হই, তখন
 আমি তোমার হই
 তুমি
 আমার কোলের শিশু হ'য়ে আমাকে বরণ করে
 আমাকে হরণ করে
 পূরণ করে।

খেলা

আমি তো চাই কঠিন অসিধারা—
 দৃষ্টান্তীতে অতনু প্রশয়
 হৃদ হ'লে লোহিতে দিশেহারা
 দীঘির জলে নয়ন ঢাকে ভয়।

হয়তো ছকে তোমার চেনা ঘুঁটি
 এবং খেলা তোমার স্থির জয়
 তবুও আমি চতুরতর জুঁটি
 আমার হারে তোমার জিৎ নয় ॥

স্থির বিন্দু

নোকো কাঁপে, অঙ্ককার, গান,
গঙ্গা ছুঁয়ে সাস্বনার ভাষা
যৌবনের চিরন্তন ধ্যান
যৌবন-উত্তীর্ণ ভালোবাসা ।

কী যে আছে, কিছু থাকে কিনা
সব প্রশ্ন অবান্তর হ'লে
অতঃপর জমে কিছু দেনা
বিশ্বাসের অন্তর-মহলে

যার শুরু যার সারা সব
একটিই বিন্দুতে উপনীত
আর সেই মহৎ উৎসব
যৌবনেও যৌবন-অতীত ।

মন্দির

তোমার জগ্রে আকাশ, নদী, ফুল, কিংবা বই, ছবি
তোমার জগ্রে সকাল, বিকেল, রাত্রি
তোমার জগ্রে সব

দূরে দূরে তারায় তারায় তোমার তারায়
একটি ছায়ায় শরীর, কঠিন অঙ্ককার,
একটি বিধাক্ত তীর,
কাঁপন, মাটির কাঁপন, চষা মাটির কাঁপন,
অমোঘ মুঠোয় নীল যন্ত্রণার ঘূর্ণি,
(নাকি প্রার্থনার স্মৃতি ?) আহা

প্রথম পাপের মধ্যে সবচেয়ে প্রাচীন পুণ্য ।

পাহাড়

কেউ বলুক, না বলুক, তুমি সব জানো ।

তবু কোথাও পাহাড় আছে

ছোটো কথা, বড়ো কথা, ছোটো দুঃখ, বড়ো বেদনা

সব ছাড়িয়ে

মন্ত এক হাসির পাহাড় ।

একদিন

সেই পাহাড়ে ঘর বাঁধবো তোমার সঙ্গেই ।

লোকে বলুক, না বলুক, তুমি জানো ।

লগ্ন

তাদের সবাইকে ডেকে বললুম, “তবে যাই ।”

— “যতদূরেই যাও-না-কেন, ফিরতে তোমায় হবেই,” তারা বললো ।

— “কিন্তু কেউ তো সে-দেশ থেকে ফেরেনি । সেই চিরদিনের বিদেশে তারা হারিয়ে গিয়েছে । সেই ছোটো শিশু, যে হামা দিতে দিতে গড়িয়ে পড়লো, ওই যে মেয়েটা পেয়ারা পাডতে গিয়ে খ’সে পড়লো, প্রিয়ের কোল থেকে এলিয়ে পড়লো যে-তরুণী, কেউ তো ফিরলো না ।”

— “সবাই ফিরেছে ।” তারা বললো, “সবাই সংহত হয়েছে একটি সজীব বিন্দুতে যা তাদের নিয়েও তাদের ছাড়িয়ে আছে । তুমিও ফিরবে ।”

— “কিন্তু কোন্ পথে ? যাবার পথ তো আমার পদক্ষেপের সঙ্গে সঙ্গে সৃষ্টি হবে, আর আমি অতিক্রান্ত হ’লেই তার বিনাশ । ফেরার পথ আমি কেমন ক’রে চিনবো ?”

তারা জবাব দিলো, “যতদূরেই যাও-না-কেন ফিরতে তোমায় হবেই । যে-বিন্দুতে দাঁড়িয়ে আছো, আসলে তুমি সে-বিন্দুতেই থাকবে, কারণ তা অতিক্রম করা অসম্ভব । যে-পথ তুমি এইমাত্র গড়বে, সে-পথ গড়া ছিলো, চিরকাল গড়া থাকবে । আসলে কোনো কিছুই বদলায় না আর সব কিছুই ছিলো, থাকবে । তুমি কোথাওই যাবে না কারণ অজ্ঞাত, অজ্ঞ কোনোখান ব’লে কিছু নেই ।” বলা হ’য়ে গেলে তারা, আমার বকুল-পাকুল শাল-

পিয়ালেরা ওপর দিকে আঙুল তুলে দেখালো, বে-আকাশ তারা চিরকাল দেখিয়েছে।

আর আকাশ ঠিক তেমনি ক'রেই ব'য়ে যেতে লাগলো, সময়ের নিঃশব্দ-মুখর বৃষ্টি বরিয়ে।

আদি-অন্ত

আমি ছাড়া তোমার আর কে আছে? সে বললো, নীল আকাশ। আকাশ ছাড়া তোমার আর কে আছে? সে বললো, সবুজ ধান। ধান ছাড়া আর কে আছে? গেরুয়া নদী। নদীর পরে? পঞ্চবটি। পঞ্চবটি ছাড়া? সোনালি হরিণ। হরিণের পরে? ঝড়। ঝড় ছাড়া? অশোক কানন। অশোক কাননের পর তোমার আর কে আছে? কালো মাটি। কালো মাটির পরে? তুমি আছো।

এই প্রিয় মুখগুলি মেঘের মতন

প্রিয়জনদের জরা আমি আর দেখতে পারি না

আমি চোখ মেলে-মেলে দেখতে পারি না

এই প্রিয় মুখগুলি মেঘের মতন গ'লে যায়

চোখের পুকুর ঘিরে পানি ছেয়ে আসে, প্রিয় ভ্রূর

রেখাগুলি ডানা গুঁজে ম'রে যাওয়া পাখির মতন

মুখ থুবড়ে পড়ে, এত প্রিয় ওষ্ঠাধর ঝড়ে ঝ'রে পড়া

অপক ফলের মতো ধুলোয় শুকোয়, সব কী-ভাবে শুকোয়,

সব কী-ভাবে এখন ওড়ে হাওয়ায়-হাওয়ায়

কুচি-কুচি কাগজের মতো সব কী-ভাবে মিলায়।

কী-ভাবে হৃদয় ছাউনি গুটিয়ে ফেলে

প্রস্তুতিতে পথে নেমে আসে,

এইমাত্র হাত তুলে ভাড়াগাড়ি যে-কোনো থামাবে,
 হাত তুলে, বিদায় জানিয়ে চ'লে যাবে !
 কী-ভাবে এখন দেখি হৃদয় গুটোয় ।
 কী-ভাবে অন্তর সব ঝকঝকে বাসনগুলো তাক থেকে নিয়ে
 ভীষণ ঝংকার তুলে পাথরে ছিটিয়ে ফেলে ভাঙে,
 কী-ভাবে এমন ক'রে রোদে সব শব্দ মিশে যায়,
 সব চিহ্ন গ'লে যায়,
 এই প্রিয় মুখগুলি মেঘের মতন
 আকৃতি বদল ক'রে ভেসে চ'লে যায়
 আমি চোখ মেলে রেখে ঘাস জ'লে যাওয়া
 এত কাছের উঠোন আর
 দেখতে পারি না ।

রথের মেলায়

রথের মেলায় তুমি বলেছিলে সঙ্গে নিয়ে যাবে ।
 আমি ভেঁপু কিনবো রঙচঙে, রথ কিনবো দুটো ঘোড়া
 জোতা, হাঁড়িকুঁড়ি, বুড়োবুড়ি, কাঁচকড়ার
 মেমপুতুল, মুখোশ । হাটস্থদ্ধু কিনে ফেলবো
 এত লম্বা ফর্দ বানিয়ে, আমি একথুবি
 পয়সা জমিয়ে ব'সে রইলুম দাওয়ায়
 তুমি ফিরে এসে সঙ্গে ক'রে রথের মেলায়
 নিয়ে যাবে ।

দাওয়ায় ব'সে ব'সে আমার হাত-পাগুলো
 লম্বা হ'য়ে গেলো, ফর্দটা উড়ে গেলো হাওয়ায়,

‘আমার খুঁটিভরা ফুটো পয়সা তোর লজ্জা মোহর
হ’য়ে গেলো — তোমার রথের মেলা থেকে
আমার আর কেনবার কিছু রইলো না ।

এবার আমি দাওয়া ছেড়ে উঠে যাবো ।

বাড়ি

এ-বারান্দা, ও-বারান্দা, এ-ঘরে সে-ঘরে আমি
কেবলই পালাই । একটাই বাড়ি আর ঘর কটা
গোনাগুন্তি, তাই অতঃপর ঘুরে-ঘুরে যেখান
থেকে শুরু সেখানেই ক্লান্ত হ’য়ে ফিরে আসি ।
দেওয়ালের ছবিটা যতই রঞ্জিনীর হাসি হাসে,
মেঝের ছায়াটা তার বিরোধিতা করে । কী ভীষণ
উচ্চ শব্দে চাঁচামেচি চলে এ-বাড়িতে, কাচগুলো
খান্‌খান্‌, বাসনকোসন তোলপাড়, প্রচণ্ড
কলহে মত্ত এ-বাড়ির দরজা-জানলা-ছাদ-
দেয়াল-দালান । আমি পালাতে-পালাতে
একদম ক্লান্ত হ’য়ে আঁচল বিছিয়ে
এই উন্মত্ত মেঝেতে শুয়ে পড়ি ।

বৃষ্টি পড়লে

বৃষ্টি পড়লে মনে হয় ঘরটাই নীল হ'য়ে কেঁপে-কেঁপে
ঝ'রে পড়লো, যেন অজস্র সময় এসে কোথা থেকে
ঘর ভ'রে দিলো, যেন অজস্র বাতাস এসে ঘরটাকে
নদীকূলে তুলে নিয়ে গেলো, নৌকো হ'য়ে ভাসলুম
ভিজলুম, হুলতে-হুলতে কঁাপতে-কঁাপতে চলতে
লাগলুম, ঐ দেখা যায় মোহানার রেখা, যেন
চারদিকে ঢেউ ফুঁসে উঠছে যেন কেউ কোনোদিকে
নেই যেন গভীর কান্নায় গলা বন্ধ হ'য়ে
যায় যেন ভয়াল কঠোর কান্না ঘরটার
কণ্ঠরোধ করে — কেমন আশ্চর্য নব ইন্দ্রজালে
দশদিক মুহূর্তে চমকায়, যেন সব কিছু ঠিক
আসল চেহারা হ'য়ে যাবে, যেন সবই নাচ,
সবই ছন্দ, সব কিছু রঙ-করা আলো —
ঘুম ভেঙে বৃষ্টি দেখলে মাঝে-মাঝে এ-রকম
হয় তখন প্রার্থনা করি হে আকাশ
ঘর ভেঙে আরো বৃষ্টি দাও ।

টেলিফোন

মাঝে-মাঝেই, ঘরের কাজে যখন ব্যস্ত থাকি,
আমার যেন মনে হয় উপরে ঘন্টি বাজছে,
টেলিফোন । হাতের কাজ ফেলে ছুটে যেতে গিয়ে
খেয়াল হয় ওটা আমাদের বাড়িতে হ'তে পারে
না । বন্ধ থাকলেও, আমাদের ফোন নেই ।
ভালো ক'রে কান পেতে শুনলে বুঝতে পারি

ঘণ্টাটা আসলে বাজেইনি । এ-বাড়িতে নয়,
কোনো বাড়িতেই নয় । ওটা আমার মনের ভুল ।
আবার হাতের কাজটা তুলে নিই । কাজ শুরু
করলেই অনেক দূরে টেলিফোন বাজতে থাকে ।
আমি অস্থির হ'য়ে শুনতে পাই, কেউ
সাদা দিচ্ছে না, ফোনটা বেজেই চলেছে
একটানা । যদিও জানি তা এ-বাড়িতে নয়,
ও-বাড়িতে নয়, কোনো বাড়িতেই নয় ।

শফরী আমার

বুকটাকে কাচের চৌবাচ্চা ক'রে আমি
লাল-নীল ভালোবাসাগুলি সযত্নে পুষেছি
তোমাদের প্রত্যেকের নামে-নামে পৃথক শফরী
হৃদয়ে আমার খেলা করে
তৃপ্তিভরে চেয়ে থাকি
আহা, প্রীতি, স্নেহ, ভালোবাসা
আমার হৃদয়ে তারা ঘর পেয়ে
কেমন স্বচ্ছন্দে খেলা করে...

হঠাৎ মার্জার এসে কাচ ভেঙে সব মেরে গেলো ।

অভঙ্গুর

কে অশ্রুর ঘর ভাঙতে জানে ?

এমন নিটোল মুক্তো

ঘরের মতন

এত অভঙ্গুর সত্য

স্পর্শ করে এত শক্তি কার ধমনিতে !

কে অশ্রুর ঘর গড়তে জানে ?

যার-যার নিভৃত কুঠুরি

তরঙ্গে-তরঙ্গে গডি রেশমি পোকায় মতো একা

একান্ত স্বগত

অবিকল্প

স্বয়ংকেন্দ্রিক ।

সেই ব্যক্তিগত ঘর যদি ভেঙে যায়—

নিশ্চয় নিজের হাতে শাবল চালিয়ে

খিলেন ভেঙেছো । খিলেনের চাবির পাথর

যে গড়েছে, শুধু তার চেনা ।

নতুবা, পিস্তের দোষ দিয়ে ।

অশ্রু-পরে পারে না এসব ।

আর পারে, কেবল দেবতা ।

যত নীল পাগল পাহাড়

সব নীল পাহাড়েরা আস্তে মুছে যায়

অগ্রসর দেওয়ালের নিচে

এবং হঠাৎ

একটি উলঙ্গ তরু সামনে দাঁড়ায়

অবিখ্যাত স্পষ্টতায়

নুকোনো সূর্যের কোনো ঝাপছাড়া শিখা

তাকে সহসা সাজায়

প্রায় হাস্যকর

অস্থিসার হাতগুলি জট পাকিয়ে যায়

আকস্মিক পর্দা-হেঁড়া আলোর দম্বায়

যখন সে গোপনে ব্যস্ত ব্যক্তিগত কাজে—

ও কে

শক্তিমান, বহুভুজ, ভয়াল দেখায়

তামার মূর্তির মতো, নগ্ন দেবতার ।

বুটিদার পটভূমি ক্রমশ হারায়

গাঢ় শাদার প্রলেপে

শাদার প্রত্যেক ঢেউ খাঁটি জরিপাড়

প্রত্যেকটি পাহাড়ের ঢালে ।

দীর্ঘ মিনারটি যেন মুঠোয় ঝাঁকড়ে রাখে

যা কিছু ধরার । চুড়োর জানলায় বুঝি

অগ্নিকাণ্ড লাগে, একফালি আগুন নাচে

কোনাচে চুড়োয়, যেন

জ্যোতির্মণ্ডলে ঘেরা ছুঁই দেবদূত...

আর

লালচে ছাদের নিচে শাদা কুঠিঙলো

হঠাৎ অলস, ক্লান্ত, অন্তর্বর্তী হয়

তারপরে

মেঘেরা বাজনা বদল করে, তারপরে

আলোরা নাচ বদল করে, তারপরে
সব নীল পাহাড়েরা আবার জন্মায়
শূণ্যস্থান থেকে ।

ছুটি

তোমার জন্তে কী না পারি ? প্রিয় আমার,
আমার যা-কিছু সকলই তোমার জন্তে সাজানো আছে ;
তোমায় শুধু খুশি দেখবো ব'লে আমি কী না
করতে পারি, প্রিয় আমার !
বকুল ফুলের গন্ধ তোমার সন্ম না বলেছিলে,
আমার উঠোনে প্রপিতামহের বকুল গাছটা
আমি তাই কেটে ফেলেছি । তোমায় খুশি
দেখবো ব'লে ।

রত্ন পেলো হয়তো তোমার ভালো লাগবে ভেবে,
ঢাখো ঢাখো আমি আমার শিশুর হৃৎপিণ্ডটা
কোল থেকে কেমন উপড়ে এনেছি, তোমার
রত্নকোষের জন্তে । (এর চেয়ে দামি রত্ন
আমি আর কোথায় পেতাম !) শুধু তোমায়
খুশি দেখবো ব'লে ।

কিন্তু, কী আশ্চর্য, প্রিয়, মানুষের অন্তরের খেলা !
তবুও আমাকে তুমি ছুটি দিয়ে দিলে ।

দ্বীপান্তরী

এখন তাহ'লে আমি বিনা প্রতিবাদে
সব অভিযোগগুলি মাথা উঁচু ক'রে মেনে নিয়ে
স্পষ্টত অন্তরশূন্য প্রস্তুতফলক হ'য়ে যাবো ।
আমি তোমাদের সব প্রীতিহীনতার পাপ
নিজেই স্বীকার ক'রে নিয়ে, নিজের মণ্ডলে স'রে যাবো ।

একদা নির্জন রাত্রে অকস্মাৎ শূন্য আদালতে
বিচারক, বাদীপক্ষ, উকিল, কেরানি
একজোটে চায়ের টেবিলে গোল হ'য়ে, আমাকে একেলা
নিতান্ত নিঃসঙ্গ, নগ্ন, কাঠগড়ায় তুলে
দ্বীপান্তরে ঠেলে দিয়ে, দল বেঁধে
চায়ের মজলিশে ফিরে গেলো ।
যাবজ্জীবন সেই চায়ের আসরে তোমরা বন্দী হ'য়ে আছো
আমি পাল তুলে, ভেসে-ভেসে দ্বীপে চ'লে যাবো ।

হুৎপিণ্ড কোনোদিন ছিলো কি ছিলো না—
কৈফিয়ৎ অদরকারি । সব কিছু পেয়েছিলে, যা-কিছু
আমার বুকে ছিলো । বিনা প্রত্যাশায় আমি
নিরাশ্রয় প্রিয়মন্ততায় পকেট ভরিয়ে নিয়ে
এইবারে দ্বীপে চ'লে যাবো ।

সেই দ্বীপে কোনোদিন তোমাদের জাহাজ যাবে না ।

একদিন পাতিহাঁসের মতো

চুপ ক'রে থাকতে-থাকতে একদিন
বুলি ফুটবে । একদিন
নদীর বাঁকে থেমে দাঁড়িয়ে, ঘুরে দাঁড়িয়ে
হেঁকে বলবো : 'আর নয় ।'
সূর্য পাটেই নাযুক আর শিয়রেই জলুক
আমি বলবো : 'আর নয় ।'
তখন গাছ-গাছালি, ঘাসপাতায় শিরশিরিয়ে
হাওয়া উঠবে,
সমস্ত তিক্ততা, সব ক্লান্ততা পারদের মতো
ভারি হ'য়ে গড়িয়ে যাবে, তলানি হ'য়ে
জ'মে থাকবে ঢের নিচে, বালি, পাথর,
কঁকরের গায়ে গা মিলিয়ে । উপরে খেলবে
হালকা স্বচ্ছতার স্রোত—উপরে তরঙ্গিত
হাজার সূর্যের বাঁকা ছুরি—শুচিতার ঢেউয়ে
গা ভাসিয়ে, পাতিহাঁসের মতো নিশ্চিন্তে
আমি তখন ঘরোয়া জলে নেমে যাবো ।

কুকুর

কোনো রাতে অন্ধকারে অবিরত ভাল খুলতে-খুলতে
টুলটাকে মনে হয় বশংবদ বিলেতি কুকুর
আমার আশ্রিতে যার মৌলভাবে কোনো লাভ নেই ।
নিজের মনিব যার নিকটেই নেপথ্যে কোথাও,
অঙ্গুলিহেলনে তাঁর নিমেষ-মধ্যেই নির্ঘাৎ
কণ্ঠলগ্ন হ'তে রাজি সে অবশ্য যে-কোনো জীবের ।

তুমি, আমি, আমরা যে-কেউ—

কুকুর পুষিনি যারা সদরে-অন্দরে কোনোদিনও,
তার মর্ম বুঝবো না ঠিক ।

ঘাপটি মেরে শুয়ে থাকে অন্ধকারে কোনো কোনো রাতে
টুলটা, নির্লোভ, যেন বশংবদ শিকারি কুকুর ।

গৃহস্থালি

এ এক বিচিত্র পরিবার ।

হৃগৃহিণী হুৎপিও সারা দিনরাত

পরিশ্রম ক'রে চলে বিরতিবিহীন

যদিও একাকী নয়, সঙ্গে আছে ভৃত্য-পরিজন

স্নায়ু, পেশি, শিরা ও ধমনী—

অথচ কী স্বচ্ছন্দ, মুক্ত, ঝকঝকে হিশেবি সংসার !

পেশিরা নিকাম কর্মী,

সদাব্যস্ত যে যার ধান্দায় ।

কিন্তু সারা দিনরাত, বিরতিবিহীন

কঁাকি দিয়ে, গুটিহুটি, চিলেকুঠুরিতে

নিষ্কর্মা, আলস্তপুষ্টি, ঘোর নেশাখোর

গৃহস্বামী—

মস্তিষ্ক ধুমায় ।

অন্তেরা

আমি চেয়ে-চেয়ে দেখি, কী অবলীলায়
অন্তেরা বাগান করে । দোরের গোড়ায়
জমির টুকরোখানি নির্ঘাৎ জড়ায়
বাহারি পুষ্পের জালে, হেলায়-ফেলায় ।

শুধু আমি ঘেমে নেমে কান্তে কাঁচি শাবল চালিয়ে
প্রাণপণে যুদ্ধ করি, ফুল তবু বেড়ায় পালিয়ে ।

যখন আমার সঙ্গে সমুদ্রের ভয়াল সংগ্রাম
তখন অন্তেরা দেখি নুলিয়ার মতন নিপুণ
তরঙ্গ-কেলিতে মত্ত অউহেসে । মুখ ক'রে চুন
আমিই কেবল প্রাণ ঠোঁটে নিয়ে তীরে উঠলাম ।

শুধু চেয়ে-চেয়ে দেখি, কী অবলীলায়
অন্তেরা নিশান রাখে নতুন টিলায় ।

স্পন্দন

‘স্পন্দন’ শব্দের অর্থ

তার কাছে সেদিন হঠাৎ
পালটে গেলো । যেমন গভীর
তুষার ফাটিয়ে, ছোটো নীল ফুল একলা প্রথম
ভীষণ সাহস করে, হঠাৎ যেমন
পুরোনো স্মৃতির মতো একফালি আলো
মুখের পাশটিতে পড়ে ।

শব্দেরা চপলমতি, লক্ষীর মতোই

ঘর থেকে ঘরে-ঘরে ঘুরে

চরিত্র বদল করে, এবং হৃদয় ।

‘স্পন্দন’ শব্দের মুখ

ইঠাৎ তুৰোড়

পাণ্ডনাদারি কায়দায় হাজির সদরে —

জন্মান্তর জমা হওয়া ঋণের দলিল

অকস্মাৎ পুরো তার বগলদাবাতে ।

‘স্পন্দন’ শব্দের কাছে

অতএব, এ-জন্মের মতো

দাসখণ্ড লেখা হ’য়ে গেলো সেই স্বাধীন মেয়ের ।

অন্তরা

১

অন্তরা, উদিত হ’লি আদি জলরাশির অন্তরে

প্রথম সূর্যের মতো চিরনব, চিরপুরাতন —

আমাকে বানালি বিশ্ব,

হাত ধ’রে হেঁটে গেলো সার দিয়ে আমার ভিতরে

ক্রমবিবর্তনমান ইতিহাস ও প্রাগৈতিহাসিক,

অন্তরা, তোমারই পুণ্যে আইনত প্রবেশ পেলাম

পূর্বপুরুষের দশমহলা অন্তরে

এখন তোমার ছুটি কচি হাত মুঠোয় জড়িয়ে

ভবিষ্যৎটাকে আমি করেছি আমারই কাছে ঋণী

অন্তরা, ত্রিকাল তুমি মুহূর্তেই দিয়েছো ভরিয়ে
তোমার কল্যাণে আমি ধরিত্রীর সমবয়সিনী !

২

কী তুই আশ্চর্য মেয়ে একরত্তি পিকোলো আমার
আনন্দকে করেছিস বশংবদ ছায়া শরীরের—
যেদিকে ফেরাস মুখ, ফুটে ওঠে খুশির কদম
বিস্ময়ে তাকিয়ে থাকি, সোনামণি পিকোলো আমার :
এমন আনন্দে তুই দাবি পেলি স্ববাদে কিসের ?
যেদিকে খেলাস মুঠি, ধরা পড়ে হাসির ফাহুশ
কী তুই আশ্চর্য মেয়ে যাদুকরী পিকোলো আমার
নিশ্চিন্তে ঠেলিস পায়ে সব দ্বন্দ্ব শুভ-অশুভের !

৩

আমি তো এখানে আছি প্রতীক্ষায় এখনো তেমনই
তবে কেন স্বপ্নে তুমি রোজ কেঁদে ওঠো
কেন ভয়, এত ভয়, নিদ্রার কাঁথায়
যাকে মুড়ে রাখা যায় না ! সময়-বেহুশ
আমি তো এখানে আছি পাহারায় আজিও তেমনই

কার বনে তুমি পথ হারালে হঠাৎ ?

১৫ এপ্রিল ১৯৬৪

নয়া দিল্লি

ছোট্ট একটা ছবি স্টেটে রেখেছি
 আমার রান্নাঘরের দেওয়ালে ।
 নীল আকাশে কচি-কচি তারের ডালপালা
 তাতে চিকন চারটি তারের পাখি দিয়ে
 একটা যন্ত্র তৈরি ক'রে, তার গায়ে
 মস্ত এক হাতল লাগিয়েছেন শ্রী পোল ক্লে
 যেন ঘোরানো মাত্রই
 এই লম্বা-লম্বা তারের জিহ্বা খেলিয়ে
 কলকল ক'রে উঠবে তাঁর পাখির যন্ত্র ।
 নাম রেখেছেন : কাকলিযন্ত্র, The Twittering Machine !

ছবিটা দেখলেই আমার তোর কথা মনে পড়ে
 কচি-কচি চারটে তারের পাখি ব'সে আছে
 তোর মধ্যে, আর হাতলটা তোর দশ আঙুলে
 বন্দী । আধো বুলি ফুটতে-না-ফুটতেই
 খই ফুটিয়ে ব'সে আছিস
 আমাদের তৈরি-করা কাকলিযন্ত্র,
 তুই —
 নীল আকাশ ব্যোপে ।

কোনোদিন মৃত্যু হবে এই শিশুটিরও ।

এই যে হৃদয়ের শিশু, যাকে আমি প্রাণের আরাগে
 যাকে আমি পৃথিবীতে বহু সাধনায়
 আমি যাকে আনলাম । এবার আমায়

সে যদি জিজ্ঞেস করে : ‘কিসের আশ্বাসে
আমাকে এনেছো এই ঝলমলে আজব আলয়ে,
কোন মহৎ উৎসবে আমি যোগ দেবো, যাবো ?’
আমি ম’রে যাবো ভয়ে ।

ভয়ে আমি ম’রে যাবো, আমি অজ্ঞতায়
চেতনাবিলুপ্ত এক অন্ধকার শূন্তের গুহায়
দৌড়িয়ে পালাবো ।

তোকে আমি কী জবাব দেবো !

গোচর

রোমন্থনে কাজ নেই । এখন চরার জমি চাই ।
যদিও পরিচ্ছন্ন, ধুনো-জালা, নিকোনো গোয়াল,
চোয়ালেরও ক্লাস্তি আসে । যদিও বৎসলা,
হৃদয়েরও ক্লাস্তি আসে ।

রোমন্থনে সুখ নেই—
গোষ্ঠরাজ, অনুমতি করো, আমার চরার জমি চাই ।

মশারি

তুমি এখন আমস্টারডামে, নাকি মেক্সিকোয় ? তুমি
এখন ভূমধ্যসাগরের আকাশে, নাকি অতলান্তিকের
টেউয়ে নাচছে তোমার হালকা ডানার ছায়া—নাকি
তুমি আন্তে গুয়ে আছো ম্যানহ্যাটানের কোনো
পঁচিশতলার পালকে ? মোটমাট তুমি এখন

কলকাতাতে নেই । কিংবা শান্তিনিকেতনেও না
মোটকথা, মশারির মধ্যে আমি আর
এক-মশারি রক্তথেকো মশার পিন্ পিন্ পিন্ পিন্ ।

বেম্পতিবার

ভেবেছিলাম বেম্পতিবার যাবো । তারপরেই কাজ প'ড়ে
গেলো । বুধবার তোমার অফিস । সোমবার ছেলেটার ইশকুলে
পুরস্কার-সভা, আর মঙ্গলবারে বুঝি ভাইঝির আশীর্বাদ ছিলো ।
শুক্র-শনি মাসশান্তি এলেন । আর রোববারেই তুমি
চ'লে গেলে ।

পুষ্পিত প্রহার

তুমি মেরেছিলে ব'লে আজ আমার ফুলন্ত বাগান
প্রতিটি আঘাত কাঁপে কণ্টকিত কেতকীর ঝাড়ে
গোলোক চাঁপায় ঝরে সকালের অশ্রুজল যত
শোণিতাক্ত কৃষ্ণচূড়া জ'লে ওঠে বসন্তবাহারে ।
কোনোখানে লেখা নেই সেদিনের বিস্মৃত বানান
সমস্ত বেদনা এক পুষ্পময় প্রহারে সংহত ।

আরেক আকাশ

‘সব আলো ফিরে দাও, সব রঙ, সকল উত্তাপ—
আমি সব বেঁধে নিয়ে আরেক আকাশে যাবো আজ...’
এই ব'লে ফুঁটিভরে নবোত্তমে সূর্য মহারাজ
পাপপুণ্য মুছে নিয়ে প্লেটে শুধু লিখে অভিশাপ
চ'লে গেলো অচিন আকাশে ।

হাসিমুখে পাশে-পাশে
আজন্মের বন্ধুরা সকলে
চন্দ্র, তারকারা গেলো চ'লে ।

আকাশগঙ্গা

বুখা ভাবনা ছেড়ে দিয়ে আকাশে তাকাও ।
পবিত্র, বিমুক্ত, বুদ্ধ, অশোক আকাশে
সিন্ধুর সাযুজ্য ঢাখো, তরঙ্গিত তারা
একে-একে ছলে উঠবে ।

আকাশে তাকাও

মধ্যরাতে দিবারন্ত্র এ-হেন বিদেশও
সহসা বাজাবে ঘণ্টা অকালবোধনে ।

অস্থায়ী নোঙর

এখন অবেলা নয়, পাতা ঝ'রে-ঝ'রে
এনেছে বৈরাগী রঙ মধ্যাহ্ন-বাতাসে
সেতুর ছায়ায় কাঁপে অলস প্রহরে
নদীর বিস্তৃত বুক । স্রষুপ্ত প্রবাসে
বিদেশী নৌকোর হাল, অস্থায়ী নোঙরে ।

সমুদ্র

পুনশ্চ সমুদ্র সত্য । সিন্ধুর ডাকেই
বারংবার সাড়া দিয়ে জেগে উঠি । নেই
কোথাও স্বপ্নের নেশা । সমস্ত বাস্তব
একটি তরঙ্গতৃপ্ত সমুদ্রের স্তব ।

ফেরা

মনস্তাপে ফিরবে না । ফিরবে না নূকোনো কান্নায়
কাঠ, বালি, প্রস্তরের অত্যাশ্চর্য জাহ্নু মহিমায়
মিশে গেছে বিশ্বস্তির অচেনা দেয়ালে ।

কখনো ফেরানো তাকে যাবে না প্রয়াসে ।
যে ফেরার, সে নিঃশব্দে নিজের ফিরে আসে
যুক্তিহীন — কালের খেয়ালে ।

তখন সমস্তা তাকে ঘরে তোলা নিয়ে ।

আবার চড়ুই

আমাকে বোলো না তুমি পরী হ'তে আর ।
আমি পরী হ'তে আর পারছি নে কোনো প্রহরেই ।
চন্দ্রালোকে ভয় করে, নির্জনতা বিষম ওজন...
দোহাই তোমার !

আমার হৃদয়ে আর জ্যোৎস্না বাকি নেই
সূর্যালোকে আষ্টেপৃষ্ঠে বাঁধা আছে মন...

আমাকে

চড়ুই

হ'তে দিয়ে ।

দোলনপদ্য

শঙ্কাহীন আশাবাদ যদি
প্রথম শ্রেণীর মন ব্যক্ত করে, আমি
প্রথম শ্রেণীতে নই । আশা
আমার দূরের দ্বীপে জলন্ত, তবুও
পথে ছরুহ সমুদ্র, নদী ।

পুনঃপুন রওনা হ'য়ে ফিরে আসি ।
আমার ক্ষিতিজ ভালোবাসা
বৃন্দেয় দোলনপদ্যে শাস্ত শিশির ।

যেহেতু বিকেলে, সূর্য ডুবে গেলে প্রাণ
আপনি স্তিমিত হয় মনে —
যেহেতু আবার, সকাল পর্যন্ত ভীত
প্রার্থনায় ভিজি সংগোপনে,
তাই পথ ঋজু নয়, গোল । বারংবার
রওনা দিয়ে, ঘরে ফিরে আসা ।

শ্রব-অশ্রবের বৃন্দেয় দরিদ্র, দুজের ভালোবাসা !

চড়ুই

কোথাও যদি হঠাৎ অসময়ে
অবোধ কোনো চড়ুই ডেকে ওঠে
অমনি তুমি ব্লুমিংটনে নেই ।

ঘুলঘুলিতে চড়ুই পাখির বাসা
খড় ছড়িয়ে ময়লা করে মেঝে
মায়ের চাবির ঝাঁচল, চুড়ি বাজে ।

ঘড়ির কাঁটায় রাত্রি, তবু পাখি ।
নাছোড় হাতে প্রলম্ব গোধূলি
আঁকড়ে থাকে ব্লুমিংটনের মাটি ।

আজকাল আর বিদ্যতে নয় ঝড়
বজ্রপাতে আকাশ অদরকারি
ঘরের কোণে মাদুর পেতে ব'সে

প্রলয় এবং ইন্দ্রপতন ঘটে ।
যে-কোনো দোর, নাড়লে কড়া, খোলে
ক্লান্ত লিয়র, কেরানি হ্যামলেট ।

সেদিক থেকে ভাবলে, চাখো, তুমি
দিব্যি আছো । যদিও ঘরে নয়,
হাতের কাছে জানলা খুলে, — পাখি !

শাদা পাখি

শাদা পাখি ওড়ে শহরে
জানলায় পাতা পাতায় আকাশ আকাশে জানলা শহরে

শাদা পাখি নাচে মাঠের মেঝেয়
পাটল পোকায় নাটের মেঝেয়
পাতায় আকাশ আকাশে জানলা জানলায় পাতা শহরে

শাদা পাখি নাচে
পাটল পোকায় নাটের মাঠেতে শহবে
ওড়ে শাদা পাখি শাদা পাখি ওড়ে
শাদা পাখি বাঁধা শহরে
ইট পাতা পাখি ইঁদুর সিঁদুর
হাতা বেড়ি ছাতা চাদর মাদুর
রান্না কান্না আগিশ আলনা ভেজাল জালনা শহরে

ওড়ে শাদা পাখি পাখি চাই পাখি
বাঁধা পাখি শাদা শহরে
বাঁধা শহরে
খেলে পাখি খাঁ খাঁ শহরে
বাঁকা শহরে ।

প্রাসাদে

এদিকে বাগান ওদিকে সিঁড়ি
চারিদিকে খোলা বাতায়ন
আর বাহারি পাতা
পাতানো জানলা পাতানো বাগান
পাতানো সিঁড়ি
আর চারিধারে আসন পাতা
থামের এপাশে থামের ওপাশে
লুকোচুরি খেলি, আসন পাতা
এদিকে তাকিয়া ওদিকে বালিশ
ফরাশ বিছানো, সোনার থালা—
সোনার পিঁদিম লুকিয়ে জালা
পাতানো ফরাশ বিছিয়ে পাতা
হঠাৎ কোথাও ছাদ ফেটে গিয়ে
টুকরো-টুকরো আকাশ ঢালা
আকাশ মাখানো আকাশ পাতা
এলোমেলো কত আকাশ রাখা
বসবে ? যাবে কি ? থামবে ? তাকাবে ?
সিঁটকোবে নাক ? উঁচোবে ভুরু ?
ধরবে বরফে তাতানো গেলাশ ?

আপ্যায়নের সবে তো শুরু —
 তর্কাতর্কি — বিষম বচসা —
 অসীম যুক্তি — অপার খেলা
 বুদ্ধি মোটা, কি বুদ্ধি সরু ?
 এদিকে ফরাশ ওদিকে বাগান
 চারিদিকে সিঁড়ি আকাশ ভাঙা
 চারিদিকে খোলা বাতায়ন ঢাখো
 চারিদিকে থাম, বাহারে, ঢ্যাঙা —
 মন ঠিক করো, মন ঠিক করো
 বসবে ? যাবে কি ? এড়াবে ? আহা !
 বড়ো মুশকিল ! এমন প্রাসাদে
 পিঁপড়ের বাসা কেন যে বাঁধা !

ময়লা ফেলার টিনে কুকুরছানা

এখন তো জেনেছিস সব ।

ও-হাড়টা হাড় নয়, আর ওই বিশাল আকাশ
 কঠিন ঢাকনা মাত্র ।

আর কোনো পথ নেই

যতবার ওই তোর রাঙানো আকাশ তোলা হবে
 ততবার পাশ রুষ্টি যুঝে যাওয়া ছাড়া ।

এখনো দমবি তোর ভিজ়ে, কচি নাক

স্বরভিত্ত আবর্জনায় ? পেট ভরবে না — তুই

যতই মানিয়ে নিস তোর ভূমিকায়

সব লক্ষ্মী কুকুরের উচিত যেমন ।

চিরকাল গোন। যাবে পঁজরাগুলো তোর

চিরকাল থিকথিকে পোকা ঘুরবে গা-য়
কোনদিন ছাইয়ের গাদায় তুই পিষে ম'রে যাবি ।

কৈদে কোনো লাভ নেই । ওরা সব জানে । তোকে শক্ত হ'তে হবে !
ঠেলে ফেলে দিতে হবে দুশমন লোহার আকাশ
তোরা কচি নাক ফেটে রক্ত ঝ'রে ক্ষত হ'য়ে যাক —
তবু—

ছোট কুকুর, তুই দেখচিসনে, ফাঁদে পড়েচিস ?

তরু

নেভিলস কোর্টের চেস্টনাট

বৃষ্টিতেই মুছে গেলো শাখা থেকে বসন্তের লেখা
মাটিতে লুটোলো রাঙা কিংখাবের মঞ্জরি ও শাড়ি
আবার দাঁড়ালো তরু পুরোনো প্রচ্ছদে পুরো একা
শ্রামল রাত্রির দিকে আবার আরম্ভ হবে পাড়ি ।

যেমন সর্বাঙ্গ নোঁপে উজ্জল ফসল ফলেছিলো
অকালবধণে তার ভেসে গেলো সর্বাঙ্গ তেমনই—
স্মৃতিতে কি কষ্ট পাও, তরু, কোনো বসন্ত উর্মিল
দূরের উদ্গানে শুনে পরকীয় মোমাছির ধ্বনি ?

সন্ধ্যামাধবী

অনেক শাদা মেরু পেরিয়ে, এবার
সবুজ পাতা, বেগুনি লাইলাক ।
বসন্তের কারিগর জাঁকিয়ে বসেছে । সেই কখন

ভোর হয় আর সারাদিনের শেষে
 আলো-আলো সন্ধে হয়, আন্তে-বীরে
 সইয়ে-সইয়ে সন্ধে নামে, সংকোচে ;
 নববধূর বিধায় । হাওয়া বয়
 ঘাসের গন্ধে, হাওয়া বয় পাতার গন্ধে, হাওয়া
 মাঠে গড়াগড়ি দিয়ে রঙিন আলো মাখে,
 অটেল সময় ছিটিয়ে-ছিড়িয়ে
 ওদের খেলার টিমে তেতালা ।
 হাওয়া বয়, সন্ধে হয়, হাওয়া বয়, সন্ধে হয়, হয়
 গ্রহের অগ্ন্যপ্রান্তে তখন চেনা সূর্য শশব্যস্তে উদয় হচ্ছেন ।

অন্যদেশ

এ-রাজ্যে বিনে ল নেই ।
 নীরজ ছপুর সব বিবর্ণ রাত্রির ভীরে ডোবে
 অল্প-খল্প সকাল গড়ায়
 তারপরই পায়াভারি বিষম ছপুরবেলা আসে ।
 নীরজ ছপুর, আর নিদ্রাহীন রাত্রি দ্বিপ্রহর
 এই দুই মেক ছুঁয়ে ছোটো-ছোটো পল-অল্পপল
 অনর্গল দৌড়োয়
 সারি-সারি জরুরি পিঁপড়ে
 গর্তের এপারে-ওপারে
 বিরামবিহীন ।

হায় শব্দ

ডাকলেই আসে না তারা
প্রচলিত ঈশ্বরের করুণার মতো —
চাই লগ্ন, চাই মতি, অন্তত খেয়াল

শব্দেরা দাঁড়িয়ে থাকে
ঠিক যেন আকাশের গায়ে
সূর্যাস্তের অসম্ভব বর্ণাঢ্য বিনয়
অসংলগ্ন, অধরা, একাকী —
অথচ সময়ে যেন ছুঁয়ে আছে সপ্রেম আঙুলে
বশংবদ ধরিত্রীর উতল কুন্তল ।

আহা, যেন চৌরঙ্গির স্টুডিওর ফ্রেমে
আদর্শ দাম্পত্য চিত্র । অথচ ভিতরে
আদৌ চেনে না তারা পরস্পর কে বা কার মুখ
কখনো রাখবে না মনে
মুজার মোহনে বাঁধা মুহূর্তের মডেল ছ-জন ।
তেমনিই শব্দেরা থাকে —
মস্তিষ্কের চূড়োয়-চূড়োয়
গোলাপি সূর্যের শিখা ।
দৃষ্টিপাতে চকিতের হোলি —
কিন্তু ওই পর্যন্তই ।
বরফ গলাবে, এমনই উত্তাপ দেবে,
এত কাছাকাছি হবে,
খবরদার ভেবেছো কখনো ! কৌচার ফুলটি
আঙুলে সাপটে ধরে শব্দের বাবুরা
কলমের কর্দম এড়িয়ে চড়েন
কল্পনার ল্যানডোর পাদানে ।

দর্পণ

আকাশে ধরোথরো আলোর কাঁপা ঢেউ
আঁধার-তরলীরা সহজে তোলে পাল
একদা যে-কথাটি শোণিতে গাঁথা ছিলে।
অদৃশ্য সে-শপথ স্বয়ং ফেরালাম ।

একটি ঘন আশা জীবন-মন্ডিত
আজকে যামিনীতে মিথ্যা হ'য়ে যাক
যে-পথে হেঁটে এসে এ-নদী ছুঁয়েছি, সে-
পথের দিশা নেই, বালির জঞ্জাল ।

ঘোষণা করি তবে অশ্রুহীন চোখে
দর্পণে যে-মুখ দেখেছি আমি আজ
জাত সে পিঞ্জরে, আকাশে ভয় তার
খাঁচাতে ফিরে যেতে রাজি সে স্মরণে ।

প্রাথমিক

আবার আমারে কেন অরণ্যের পুরোনো আঁধারে
অলক্ষ্যে এনেছো একা আশ্চর্যের অলীক আশ্বাসে !
আমি তো জেনেছি সবই, আবাল্যের অভ্যস্ত খেলায়
আমারে কেমনে তুমি যুগান্তরে আবার ভুলালে !

পুনশ্চের পুরাবৃত্ত সম্পূর্ণ অধীত ছিলো বটে
তা সবে কী-ভাবে ঘটে এবংবিধ স্বজীর্ণ প্রমাদ
কারণ অবোধ্য আজও ! পরিচিত প্রাচীন ঠাট্টাতে
আবার, আশ্চর্য ! তুমি কোন ছিদ্রে ভুলালে আমায় !

চেনা কুল গাছ, সাঁকো, মন্দিরের চেনা ঘণ্টাধ্বনি
চেনা মাঠে সিঁধে রাস্তা পাড়াটিতে পৌঁছুবে সহজে
এ-ই জানি চিরকাল । তবু তুমি আবার আমাকে
ভুলায়ে অরণ্যে আনো আশ্চর্যের অলীক উদ্ভাসে ।

সূর্যাস্ত

‘দেখেছিলে, গতকাল কী আশ্চর্য সূর্য ডুবে গেলো ?’
প্রশ্ন তার কবেকার অন্ধকার বিদিশার নিশা—
গভীর অন্ধুট কান্না ভূমিস্পর্শ ক’রেই মিলালো ।

মুক্তি নেই । অতাবধি আকাজক্ষায় বেঁচে আছে সব ।
সহস্র আলোকবর্ষ পার হ’য়ে স্মৃতির চারণ
সেই চন্দ্র : শব্দময় হয়েছিলো গঙ্গার ওপারে ।

সেই চন্দ্র অস্ত গেছে গতকাল, গঙ্গার ওপারে—
এখন ধমনি ছিঁড়ে শোণিতাক্ত সমুদ্র মন্থন
শব্দ ও দৃশ্যের ঝঞ্ঝা, কর্ণভেদী বর্ণ-কলরব ।

জলকেলি

সামনেই ডুবে গেলো ঝড়ে-জলে চেনা নৌকোখানা
কখনো কি দেখা হবে, জলের তলার নীল দেশে ?

কখনো শৈবাল হ'য়ে আবার জড়াবো
ওই বর্ণহীন, নগ্ন, নিমগ্ন কঙ্কাল
কে ভেবেছে, — এইভাবে নবীন, জাস্তব
এমন অখণ্ড হবে জলের তলার জলকেলি ?

পথে-ঘাটে

বন্ধুকে তোমার কথা বলবো ব'লে সকালবেলায়
রাস্তায় বেরিয়ে কার সঙ্গে দেখা হ'য়ে গেলো কোন
চায়ের দোকানে চ'লে গিয়ে কথায়-কথায় বেলা
গড়ায় আজ্জোবাজ্জো কত কথায় বেলা গড়ায়
মস্ত এক তামাশা হ'লো বিরাট ভিড় জমলো পথে
অমন ভিড়ে কোথায় আমি আর রাস্তাগুলো
এলোমেলো অলিগলির ফাঁকে দৌড়ে এদিক-ওদিক
পালিয়ে গেলো বেলা নোংরা বেডাল একলা
ফিরে এলো রান্নাঘরে তখন পাতের এঁটো-কাঁটাও
নেই ।

পায়রাগুলো ঝাঁকের পাখি সময় হ'তেই উড়লো
নিয়মিত — বিকেল হবার শব্দ শুনে ফিরতে
চেয়ে দেখি পকেট কাটা । তোমার কথা
পকেটে আর নেই ।

খেলুড়ে

জানলা দিয়ে তোমাদের দেখে
আমারও খেলবার সাধ হয়
তোমরা সব দল বেঁধে পথে খেলা করো ।
আমার শৈশবসঙ্গী তোমাদের প্রিয় মুখগুলি
কাচের শার্শির ফাঁকে আরো যেন কচি
নীল পর্দা উড়ে-উড়ে পড়ে
লতাপাতার জঙলা ছায়া ঘরেই অরণ্য ব'য়ে আনে
চলতি গাড়ির আলোয় স্থাগু দেওঘালটা কেঁপে যায়
তোমাদের খেলার শব্দে
কান পেতে রাখি ।
কাচের পিছন থেকে সাধ হয়
আমার এখনো ।

ডুমুর

আবার যদি ফিরতে চাই এই দরদালান
এই বাগানকুঠি ছেড়ে তোমার ঐ ডুমুর গাছের
ছায়ায়, বন্ধু, তুমি কি আমাকে জায়গা ছেড়ে
দেবে ?
পথের শেষ নেই, এই দরদালান অনন্ত, এই
বাগান সীমাহীন, এতগুলো থাম তুমি জন্মেও
দেখোনি, এত শিউলি, এত যুঁই, এত আম,
জামরুল, এত আমি—এ তোমার সবগুলি
চোখ একসঙ্গে মেলে দিলেও ধরা পড়বে না,
এত পায়রা আসে এ-বাড়ির ছাদে, এত
খরগোশ এ-বাগানের গর্তে-গর্তে, বন্ধু, তোমার

ডুমুর গাছের ছাউনি থেকে তুমি এর কণাটুকুও
জানতে পাবে না — এত বুড়ো-বুড়ো কালবোষ
এদের কালো দিঘিতে !

সব কিছু ছেড়ে দিয়ে, দিনরাত পথ চ'লে.
দিনরাত দিনরাত সব পথ একা চ'লে-চ'লে
যদি আমি ফের ফিরতে চাই, বন্ধু, তোমার
ডুমুর গাছটি কি আমাকে ছায়া দেবে ?

তুমি ওই অদৃশ্য মিনারে

দেখলুম, তুমি কী রকম
আমার ঘাসের জমি থেকে
বাতাসের ধাপে-ধাপে চরণ ঠেকিয়ে
অদৃশ্য মিনারে উঠে গেল ।

দেখলুম তুমি সেই মিনার-চূড়ায়
সোনালি মেঘের তুলি ছ-গালে বুলিয়ে নিয়ে
সূর্যের আঙুল ছুঁয়ে শপথ জড়ালে

আর আমি অকস্মাৎ পাহাড়ি রাস্তায়
ধ্বসের সোয়ারি হ'য়ে যেন
দুঃসহ গতিতে পড়ছি
পাক খেয়ে অনন্ত কন্দরে...

প'ড়ে যেতে-যেতে আমি দেখলুম
তুমি কী-রকম আন্তে বাতাস মাড়িয়ে
সূর্যের পাড়ায় উঠে গেল ।

যৌবনের দোহাই ! তুমি যেয়ো না

অসম্ভাব্য মনে হয় যৌবনের অন্তে বঁচে থাকা
তেমনই সম্ভব নয় তুমি গেলে যৌবন বাঁচানো ।
তোমাকে ডাকি না, তবু মনে জানি তুমি ঘরে আছে
দেখি না তোমার মুখ, তবু মুখচ্ছবি মনে ভাসে ।
যদিও অযোগ্য আমি—ভাঁড়ারের ভিথিরি ইঁহর—
জানি তুমি করুণায় একচ্ছত্র এখনো আমারই ।

কবিতা, তোমাকে ছেড়ে কতকাল বেঁচে-বঁচে আছি !

তা-ব'লে আমাকে কিন্তু তুমি ছেড়ে থেকো না, আমাকে
তোমার বৃকের মধ্যে হেলায়-ফেলায় পুষে রেখো ।
তুমি ঘর ছেড়ে গেলে আমি কোন বানপ্রস্থে যাবো !

কখনো ভালোবাসা

ডাকলে আসে । পোষা কাকাতুয়ার মতো
আঙুলে এসে বসে । ফরফরায় ।
ঘাড় ছুলিয়ে, পালথ ফুলিয়ে, ঝুঁটি নাচিয়ে
বুলি কপচায় । মন-রাখা বোল পড়ে
আমার ধবধবে পাখি, আমার মন-রাখা
যত বুলি, যত শেখানো-পড়ানো বুলি,
আমার কানে মধু ঢালে ।
তারপর আড়ালে
একা
দাঁড়ে ব'সে-ব'সে

নিজের মনে-মনে
আমার ধবধবে পোষা পাখি
ঝকঝকে শেকল বাজিয়ে অট্টহাসে
আর মহাশূণ্ণে
পালক খশায় ।

স্বাগত দেবদূত

এমন কখনো হয় । এমনও কখনো হয়
বিশাল কাচের মতো নীল চোখ নিস্তরক আকাশ
হঠাৎ সর্বস্ব ঢেকে জোর ক’রে ঘরে ঢুকে আসে
কোনায় আগুন জলে, তাক-ভরা বইপত্র
বিছানার রঙদার চাদর ছাপিয়ে
নৈঃশব্দ্য ঢুকে পড়ে, পাহাড়ি মেঘের মতো, ঘরে ।
কাচের বাকশের মধ্যে প্রত্যেকেই আলাদা-আলাদা
তৎক্ষণাৎ দোকানের লোভনীয় তাকে উঠে বসি—
এখনো জোটেনি ক্রেতা, প্রতিক্ষায় পৃথক সকলে
কাচের ঘরের মধ্যে প্রত্যেকেই একা, দৃশ্যময়,
অস্পৃশ্য, স্বদূর । এমন স্তব্ধতা আসে,
এমন স্তব্ধতা ভাসে, পাহাড়ি মেঘের মতো
ঘরে । অথচ আগুন জলে কোণে, তাক-ভরা বই,
বিছানায় রঙিন চাদর ।
চারিদিকে কত চোখ, ভাষাহীন,
যেন কার ফুলের বাগানে ব’সে আছি
হাওয়া নেই—মুহূর্তেই সব ফুল কাগজের
বিজ্ঞাপনী ছবি । এমনই নৈঃশব্দ্য ঢোকে
একঘর সামাজিক গরম বাতাস

পর্বতশিখরে চ'ড়ে অকস্মাৎ বিগ্ৰহ ও ভারি —
 এত শুদ্ধ, স্বাসকষ্ট শুরু হ'য়ে যাবে যেন
 পলকে সবার । যেন নিচে, আশেপাশে, মুখ তুলে
 মাথার ওপরে, কোনোদিকে কিছু নেই, শুধু মেঘ
 শাদা মেঘ, স্তব্ধতার শূন্যতার বিপুল বিস্তার...
 একটি বাক্যের শেষ, আরো একটি আরম্ভের আগে
 মাঝে-মাঝে কী-আশ্চর্য স্তব্ধতার বহা নেমে আসে
 হঠাৎ প্রত্যেকে যেন ভিন্ন-ভিন্ন টিলার উপরে
 যোগাযোগশূন্য হ'য়ে প্রচণ্ড প্রলয়ে বন্দী আছি
 যেন সব তারযোগ ছিন্ন হ'য়ে গেছে, সব সেতু ভাঙা,
 সব রেলপথগুলো ভেসে গেছে ভয়াবহ বানে, যেন
 কোথাও নগর নেই, গ্রাম নেই, লোকালয় নেই
 যতদূর মন যায়, প্রাণ যায়, নিঃসীম এলাকা —
 আসন্ন সংকটে বুঝি স্বাসনাশি রুদ্ধ হ'য়ে আসে...

এমন সময়ে
 ঠিক দেবদূত যেমন স্বাগত
 তেমনই উত্থিত হয় কোনো শব্দ ।

ভয়ানক চেষ্টা ক'রে
 একগলা জল ঠেলে-ঠেলে
 সারারাত হেঁটে এসে কেউ
 যেন এক প্রিয়ের সংকার ক'রে গাঁয়ে ফিরে গেলো ।
 ভয়ানক চেষ্টা ক'রে
 কেউ একটা কথা ক'য়ে ওঠে
 কী-আশ্চর্য ইন্দ্রজাল —
 উচ্চারিত শব্দ যেন মস্তের মতন জ্ঞাণ করে —
 মস্তের মতন সব মৃত চোখ ত্রস্তে বেঁচে ওঠে
 ফুলের বাগানে যেন হাওয়া বয়
 কোনায় আগুন জলে, তাকে বই, বিছানায় রেশমি চাদর

নিস্কলতা এইমাত্র পথে নেমে গেছে ।
পর্দা দোলে, উষ্ণ শুভ সৌহার্দ্যের বাতাস কাঁপিয়ে
শব্দ ঘোরে — ঘর ত'রে দয়াময় শব্দ ঘোরে-ফেরে
ঘর ত'রে শব্দময়ী করুণা ছড়ায় ।

এবারে আরম্ভ খেলা

“For, from this instant/There's nothing
Serious in mortality ; /All is but toys.”
Macbeth, II 3.

এ-মুহূর্ত থেকে শুরু ক'রে —

অতঃপর সব কিছু গৌণ হয়ে গেলো ।

‘নশ্বরতা’ নামে আর গুরুভার পাথর কোথাও
আকাশ রাখবে না ঢেকে । এ-মুহূর্ত থেকে শুরু ক'রে
জীবনের সব কিছু অকিঞ্চিৎকর হয়ে গেলো ।
এ-মুহূর্ত নিজেই একাকী যা-কিছু জরুরী সব
আকর্ষণ নিঃশেষ করে নীলকণ্ঠ শিলা হয়ে গেছে ।
এর পর আর কিছু ভার নেই, বিষ নেই আর,
ভয়, বা উদ্বেগ নেই, আর কোনো সর্বনাশ নেই ।

এবারে আরম্ভ খেলা, এবার বেতরো'খেলাধুলো ।
এ-হাতে ও-হাতে লুফে সব ক'টা সুগোল বিশ্বাস —
অথবা দড়িতে হেঁটে, বার-ব্রতে, সৃজনে, বর্জনে —
এখন সমস্ত খেলা, এ-মুহূর্ত থেকে শুরু ক'রে —

অতঃপর সব ঘর পর্যবসিত খেলাঘরে ।

উন্মথিত

কে বলে তোমার মতো সর্বস্বান্ত হয়েছি আমিও ?
“যারে ভালোবাসো তারে ছেড়ে দিয়ে চলে যেতে হবে !
তাই শাস্তি নেই ।” — এই অত্যন্ত সরল বাক্যবাণে
বিচূর্ণ বিদীর্ণ করে অন্তরাগ্না নিতান্ত অক্লেশে
না-হয় ঝরায় রক্ত, টুকরো করে শিরা ও ধমনী
না-হয় সটান্ ছিঁড়ে ফালি ফালি করে সব পেশী
না-হয় গুঁড়োয় অস্থি শূন্য শাদা ধূসর পুলোয়
তা বলে কি বিনা যুদ্ধে সর্বস্বান্ত হয়ে যেতে পারি ?

এত সাধা রাধা-অঙ্গ কে দোলাবে তমালের ডালে
কেবা হেন দুঃসাহসী ? তোমাদের পোশাকী ঈশ্বর
আমার সংসারে বাঁধা চিরকাল অলু অঙ্গীকারে ।
প্রতিশ্রুতি দিয়েছেন জন্মলগ্নে আমাকে ঈশ্বর :
‘তোমার আনন্দ কাড়ে হেন শক্তি রাখিনি সংসারে ।’
এখন তাকেই ডেকে হেঁকে বলবো : ‘বুঝে নাও কড়ি
নৌকো ডুবু-ডুবু হলো, স্রবাতাস ভরে দাও পালে ।
অন্তত দেখুক ওরা কার ভরসায় আমি লাড়ি ।’

হিশেব

হঠাৎ বদলে গিয়েছে দিনরাত্রির অঙ্গ ।
এতদিন কষা হচ্ছিল যোগ আর গুণ
এবারে কষছি বিয়োগ আর ভাগ ।

এখন ভাবছি আর কী কী চাই না ।
আরো কী কী না হলেও বেঁচে থাকা যাবে
কী কী বাদ পড়লেও লোপ পাবে না জগৎ সংসার ।

দেখা যাচ্ছে, এক, দুই, তিন ক'রে ছুঁড়ে ছুঁড়ে
 ফেলে দেওয়া যাচ্ছে সব কিছুই।
 অবশিষ্ট : বাতাস, যা নইলে সত্যি চলবে না,
 বুকের ঘড়িতে দম দিতে চাই অক্সিজেন।
 এছাড়া : পরিমিত ভিটামিন, প্রোটিন, কার্বো হাইড্রেট,
 কিছুটা মিনারেলস, আর
 কিছুটা জল।

উড়াল

কালো খলিটার মধ্যে অন্তহীন নেমে যেতে যেতে
 নিরন্তর ডুবে যেতে যেতে নরম বালির মধ্যে বিদ্ধমুখ
 অন্ধকারে গৌঁথে যেতে যেতে অপস্রয়মান, ভারী
 ভিজ়ে, ঠাণ্ডা, মসৃণ বালির মধ্যে প্রোথিত হতে হতে
 হঠাৎ উথিত হ'ল শুভ্র ঋবতারা।
 হঠাৎ একবিন্দু জ্যোতি ক্রমসম্প্রসরমান
 শাদাবৃত্ত অরুণ স্তরে স্তরে ছড়ালো চৌদিকে
 শুকনো হয়ে উড়ে গেলো ভিজ়ে, ভারী, ঠাণ্ডা বালিমাড়ি
 ঈশ্বর, তোমার দৃষ্টি অন্তরের অন্তরালে পড়ে
 সমস্ত অন্ধতা শুদ্ধ সত্যতার জাহ্নমন্ত্রে মোছে, উর্ধ্বমুখী এখন উড়াল

অভিজ্ঞান

যদি বা মাছের পেটে চলে যায় অভিজ্ঞানটুকু-
 অদুরীয়ে কি দরকার
 স্পষ্টতই মনে আছে মুখ।
 কেন চিন্তাকুল দৃষ্টি, অধনু টঙ্কার
 ললাটে কুঞ্চিত রেখাবলী ?
 মহারাজ ! চিনেছো সকলি।

বুথাবাক্য কেন ব্যয়, চলো শারদত,
শার্দ্‌রব, স্বক্কে তোলো ক্লান্ত দণ্ডভার-
এ কোন্ রাজার দ্বারে হয়েছো বিনত ?
স্বপ্নাবৃত সমগ্র সংসার ।

কখনো পড়লে মুখ মনে
হে প্রজাপালক,
চলে এসো চেনা তপোবনে
যেখানে সিংহের বুকে খেলা করে তোমার বালক ॥

প্রাপ্তি

এবারে নিজেকে পেলে ।
কালান্তরী সমুদ্রের নিচে
রেখে এলে যৌবরাজ্য, সোনার মুকুট —
নগদ মূল্যের কড়ি গুনে দিয়ে রক্তে কড়ি খেলা ।
অমূল্যে নিজেকে খুঁজে পেতে না কখনো ।

অন্তরে চৌকাঠে বসে গৃহস্থালি খেলা সারা হলো
এবারে নিজের ঘর গড়ো ।
এখন নিজের হাতে নিজেকে নির্মাণ —
সদর্পে হরণ করো নিয়তির শাড়ি ।

দর্পহারী রয়েছেন আড়ালে কোথাও —
প্রার্থনায় আসেন না, তাঁকে
ফাঁদ পেতে
ধরো ॥

এইকাল : চিরকাল

॥ হম্‌কো মিটা সকেংগে জমানামে দম্‌ নহী ॥ গালিব

আমাকে নেবাতে পারে এতো শক্তি রাখে না সময় ।
কখনো ভেবোনা আমি সময়ের মুখ চেয়ে থাকি ।
সময় আমার সঙ্গে খেলে যাক যুদ্ধ-যুদ্ধ খেলা
যতোই কাড়ুক শাড়ি, লজ্জাবস্ত্র ঠিক থাকে বাকি,
মস্তবলে বেলা হয়ে যাবে সব, যা ছিলো অবেলা

ধর্মযুদ্ধে প্রতিবাদী চিরকাল দাঁড়ায় নির্ভয়
যেহেতু স্বপক্ষে তার ঈশ্বর সাধিত মহাকাল
স্বয়ং সারথি হয়ে সব ব্যুহ ভাঙেন উত্তাল ;
যতই দিক না যুদ্ধ, খণ্ডকাল হবে পরাজিত
এই তো জেনেছি শাস্ত্রে, যতোটুকু হয়েছে অধীত ।
অখণ্ড কালের পক্ষপাত — ধন্য আমি মহাশয়,
আমাকে রাঙাবে চোখ, এতো শক্তি রাখে না সময় ।

নবান্ন

আমাকে ফিরিয়ে দাও কৌমার্যের ঘাড় বঁাকা ঘোড়া
ঋতু-বীৰ্য যৌবনের চণ্ডতেজ, দুর্বীর সাহস
আমাকে ফিরিয়ে দাও প্রকৃতির স্বগত করুণা
যার স্নকুমার বীজে চক্রান্তরে আবর্তিত রস
জন্ম দেয় নীল ফুল শীত ধুই বরফ ফাটায়
হে প্রভু, মুড়েছি হাঁটু, প্রার্থনায় দুটি হাত জোড়া,
কৌমার্যের ব্রহ্মতেজে বারাস্তরে জলুক মাটি এ
নোনায় বিশ্বস্ত ক্ষেতে ঝলসাক যৌবনের সোনা
আবার আরম্ভ হোক নবান্নের দ্বিতীয় মহড়া ।

ইয়াং সি কিয়াং

বুকের মধ্য থেকে উঠে আসে চীনের প্রাচীর
রুদ্ধ করে দেয় সব । ছায়াপথ, বৃক্ষরাজি উপত্যকা
ঘন মালভূমি । বুকের মধ্য থেকে উঠে আসে
চীনের প্রাচীর । যুগান্তের অবরোধ ।

তবুও ভাসিয়ে নেয় গ্রামের ওপরে গ্রাম
ইয়াং সি কিয়াং ।

আমূল

মূল ধ'রে নাড়া দাও—
মাঝে মাঝে ছ' আঙুলে শুধু
মূল ধ'রে নাড়াচাড়া করো—

তখন ভিতর দিকে গভীর অরণ্য ভেদ ক'রে
অতিবৃদ্ধ বটগাছ আমূল উৎক্ষিপ্ত হয়—
সমস্ত শিকড়
অস্থির মুষ্টির মতো মহাশূন্যে তুলে
পড়ে যায়—
নিঃশব্দ
বিশাল

পুরোনো মাটিতে
কুণ্ডের মতন গর্ত জেগে থাকে গভীর তৃষ্ণায়
আষাঢ়ের তিল-তুলসী চেয়ে……

প্রতিশ্রুত ছিলে, কিন্তু
উদাসীন সঙ্গম নয়, ভিতরে ভিতরে
নির্বিকার হত্যা শিথিয়েছো ।

তত্রাচ, জীবন

তুমি জানো, পৃথিবীতে মানুষের প্রণয় থাকে না
পৃথিবীতে এমন কি শোকও
থাকে না, গলে যায় । এমন কি
স্মৃতিও অচির ।

কবিতাও চলে যায়, স্মৃতি ছেড়ে দিলে
মহাশূন্যে লাট খায়
পৃথিবী-সংযোগছিন্ন মহাকাশযান কোনো
যেমন নির্দিশা,
শূন্যলোকে অনন্ত বিরহী
কবি ভেসে যায় ।

তত্রাচ জীবন থাকে, যেমন তেমন
যেভাবে রাখবে, তেমনি
কোলে-পিঠে নধর, নাহ্লশ,
অথবা জুতোর নিচে, বেপরোয়া —
কেবল জীবন থাকে শরীরে শরীরে
ভাঁড়ে কিংবা রূপোর গেলাশে

তুমি যতোদিন ।

ভাসান যাত্রা

পাশ দিয়ে শব্দের মতন সব সামুদ্রিক জন্তু ভেসে যায়
কণ্টকিত নোনা জল, ঢেউ আছে ঢেউ নেই
গতিময় বিপুল স্তব্ধতা
কাগুরী তোমার হাতে ছেড়ে দিই সব ভাসা, ডোবা —
হে কাগুরী তোমার হাতেই
কখনো জলের নীচে অন্তর্হিত প্রবাল-প্রাচীরে

ঠেকে যেতে পারে ভেলা
 ঠেকে যেতে পারে হাত হাড়রের দাঁতে
 হঠাৎ উঠলে হাওয়া ভেলার ভাসান
 মুহূর্তে বিলীন হতে পারে...
 অতীব অস্পষ্ট দূরে নারিকেল পুষ্পিত সৈকত
 দূরাদৃশ্যশ্রুতিভঙ্গ্য তন্ত্রী
 চেউয়ের তলায় ঢাখো স্নানীল সবুজ
 স্ফটিক শহরে নাচে মর্মরমূর্তির মতো পরী
 তীর-বৈধা সূর্যালোকে স্তীত্র তীর্থক
 স্বর্ণ সমুজ্জল স্বচ্ছ স্বপ্নালু সময় কাঁপে জলে
 রামধনু মাছের কাঁক বর্ণাঢ্য শোভায়
 সাড়স্বরে বাঁক নেয় নৃত্যপর
 দিগন্তের দিকে...

একদিকে আকাশ সীমা,
 অগ্নিদিকে নীলাবনরাজি
 কাণ্ডারী, তোমার হাতে তুলে দিই দিক্চক্রবাল
 ভাসাও, ফেরাও, কিছা ডোবাও গভীরে...

পুতনার প্রতি

পুতনা তোমার সত্য
 কোনো দোষ ছিলো না কখনো ।
 তুমি শুধু ভাড়া-করা সামান্য দানবী ।
 কী ক'রে জানবে তুমি, দেবশিশুদের
 আকর্ষণ রক্তের তৃষ্ণা ?
 সছোজাত দেবতার ঠোঁটে
 তীব্রতর বিষ !

পুতনা, অকৃতকার্য হয়েছিলে বলে
আত্মাতে রেখো না ক্ষোভ—
তুমি তুচ্ছ নশ্বরী দানবী !

মৃত্যুহীন দেবতার দাঁতে
মারণাজ্ঞ অমোঘ শানানো ।

পদ্মার পাথর

গৃহস্বামী চ'লে গেলে অগস্ত্যযাত্রায়
মন্ত্রপুতঃ চৌকাঠ পেরিয়ে
পুরোনো জন্মের মতো ভালোবাসা, স্মৃতি ও শপথ
থুলে ফেলে দিয়ে—
লক্ষ্মীর ভিটেয় বয় পদ্মার গহন গেরুয়া ।

বাদামি বাকল ছিঁড়ে নিলে
সব বৃক্ষে ভিতরের শাঁস
বিশুদ্ধ হাড়ের মতো বর্ণহীন, শাদা ।

নিজেকে তুই অন্ধ মূক বধির নির্বোধ
জন্মমৃত্যুহীন
অন্তর বাহির শূন্য পাথর করে নে ।

ছাড়পত্র

নিজেই নিজের কাঁধে হাত রাখি,
গালে টোকা মেরে বলি : চীষার আপ্ ওল্ড গার্ল !
আয়নার সামনে গিয়ে দাঁড়াতে হয় না ইদানীং
বাতাসের স্বচ্ছতায় স্পষ্ট দেখি বানভাসি মুখ ।

লাগাতার বৃষ্টি হয়ে সমস্ত দেওয়াল গলে কাদা ।
 কি স্থলর চালাঘর, দোর, জানলা, আটচালা আছে
 কেবল দেওয়াল নেই । কোথাও দেওয়াল নেই, ফাঁকা ।
 অকূল কোপাই নদী, অনন্ত খোয়াই খেলে ঘরে
 ঘর-ভর্তি শালবন, চলে আসে আপ্ দানাপুর
 ঘর ফুঁড়ে বৈতানিক, হেঁটে যায় বসন্ত উৎসব —
 জ্যাজ শুনতে ভালোবাসো, বেলো, একটু কফি কিম্বা চা —
 সব কুঁড়ি মোর ফুটে ওঠে তোমার হাসির ইশারাতে ।

কবোফ গালফ্ ফ্রীমে নোকো যাম্ব কাশফুলদ্বীপে
 ঘরে আসে টেনুবির স্মৃতিহীন নক্ষত্রের ঢেউ
 রাইনের ওয়াইনারি, টিরোলের গ্রামীণ আকাশ
 ঘরে সোজা ঢুকে পড়ে ‘এন্ কামিনো রে আল’ সড়ক
 সতেরো মাইল স্বর্গ, নিসগাঁয় সীনিক ড্রাইভ্
 ঝোড়োহাওয়া বিলি কাটে সাইপ্রাসের ভাইনি কালো চুলে
 শ’য়ে শ’য়ে শীলমাছ প্রেমোন্মাদে ঘেউ ঘেউ ডাকে
 আদিম অনন্ত শৃঙ্খল ঝাপ খায় আলুথালু নায়েগ্রা প্রপাত
 প্রত্যেক আটঘণ্টা বাদে মেঝেফুঁড়ে সমুখিত হয়
 ছুর্নিবার গন্ধক ফোয়ারা, মুহূর্তেই তিনশো ফুট, ফুটন্ত, ধুমল —

নিজেই নিজের কাঁধে হাত রাখি, বলি :
 বুঝি কালান্তরে যাবে, ছাড়পত্র চাই ?

আইব্যাকের উত্তমর্নের প্রতি জন্মান্ব

কে তুমি দয়ালু হে আমার চোখে এসে
 নির্নিমেষ করো তীব্র দর্শন
 অচেনা নয়নের নয়নমণি দিয়ে
 একি এ প্রেতচোখে দেখাও সংসার ।

ভয়াল ঝর-চোখ শকুনি-ভীক
জগতে সব-কিছু স্পষ্ট খুলে যায়
মরণ-বাঁচনের সকলই একাকার
যতটা দেখবার — যা দেখবার নয় ।

জন্ম-অন্ধ তো ছিলাম মন্দ না
ভিতরে যাই দেখি, দিব্য, নিরুপম —
এ কার পোড়া-চোখ পরেছি আমি কার ?
চিহ্ন মুছে গেছে, ইহ বা পরকাল !

দন্ধ দেখে-যাওয়া বিদ্ধ করে সব
সদর-অন্দর প্রথর দৃশ্যে
শরীরে পুঁষি কার অনাগ্রীয় চোখ
দৃশ্যাতীত ছায়া কোথাও নেই আর !

স্বপ্নহারী এই চণ্ড চক্ষুতে
জলছে, জ'লে যায় অন্ধ অন্তর
চাইনে দৃষ্টির পরম রোশ্-নাই
দে ফিরে জন্মের শুদ্ধ আধিয়ার ।

অন্ধকার ঘর ছিলো জ্যোতির্ময়
ছিদ্রহীন ছিলো মোহন মণ্ডল
পুণ্যময় ছিলো বাতাস, ধুলোমাটি
নাও হে দয়া ফিরে — দয়ালু জহ্লাদ !

ধান্য

তুমি তো ছুঁড়েছো শেষ মৃত্যুবাণ
মরি নি তাতেও
এই ঢাখো বেঁচে আছি
ধানক্ষেতে, শীষের ভিতরে ।

তুমি তো নিরস্ত, শূন্য তূণীর তোমার
সমস্ত ছুঁড়েছো এই কুঁড়েঘরে,
বাদামী ছায়ায়—
আমার উদ্দেশে ।

সমস্ত তীরগুলি ছুঁটে এসে
ধান ক্ষেতে আছড়ে পড়েছে
তীরগুলি ধানগাছে
মঞ্জরিত শীষ হয়ে গেছে ।
তোমার কুপায়
আমার ধানের ক্ষেতে প্রতি শীষে ছুধ ।

ইহকাল

এমনও দিন ছিলো
যখন সমুদ্র উদ্বেল
যখন তুড়ি দিলেই
আসতো ঘোড়া
বাজতো খুরে
রূপোর তোড়া
মেঘলা আকাশ
মেলতো ডানা
বাতাস এলোথেলো—

এই কি তবে ইহ ?
যখন আকাশ জুড়ে
কুরুক্ষেত্র,
বাতাস জতুগৃহ ?

বন্যা।

এই যদি জীবন হয় ; জীবন-যৌবন,
আমার ও-বস্তুতে তবে কোনো লোভ নেই ।
মা, তুমি ফিরিয়ে নাও স্বপ্ন ও স্বরণ,
কবিতা কল্পনালতা, সাতরাজার ধন
যা কিছু দিয়েছো, সব ।
মাতৃস্নেহ, বন্ধুপ্রীতি, বিজয়, বিদ্বয়,
পুঁটলি খুলে অনায়াসে ছুঁড়ে ফেলে দেবো
নাড়ীছেঁড়া রক্তমাংস । নিকষিত হেম ।
রাশি রাশি স্বপ্নহারা দরিদ্র রয়েছে—
আমার স্বপ্নেতে তারা ভরুক হৃদয় ।

এই যদি জীবন হয়, জীবন-যৌবন,
তাহলে তো বিজ্ঞাপনে আমাদের শ্রেফ ঠকিয়েছে ।

চোখ গেল

না দেখাটাই ছিলো ভালো
ছিলো ভালো
ভালো ছিলো
দেখা হলেই মন ভালো নয়
মন ভালো নয়

দেখা হলেই চোখের মধ্যে
শূন্য বাসায়
চোখপাখিটা ঝাপ্টে পাখা
আছড়ে ভাসায়
আশায় আশায়

টুকরো ভাঙা ডিমগুলোতেই
তা দিতে চায়
ছিন্নভিন্ন শূন্য খাঁচায়

খাঁ খাঁ ফাঁকায়
অবোধ ডাকা
অবুঝ খোঁজায়
একলা যোঝা
মরুৎবেয়ামের মতন শূন্য
চোখের বাসায়
অচিন্তা ভাষায়
সর্ব নাশায়

না দেখাটাই ছিলো ভালো
ছিলো ভালো
ভালো ছিলো
দেখা হলেই ডানার ঝাপট
মন ভালো নয়
দেখা হলেই চোখ জলে যায়
চোখ জলে যায়
দেখা হলেই চোখ গেল ! চোখ গেল !

একেকে এক
ডোবে ভাসে
বলেই আসে
কেউ শেখেনি থাকা

গাছের তলে
গাছের ডালে
ঠোকুরানো আর দেখা

হাতের কাছে
ত্রিলোক আছে
বুকের ভেতর ফাঁকা

পুন্নাম

সচ্ছিদ্র গেঞ্জির মতো অবিকল স্বচ্ছন্দে, হৃদয়
খুলে ফেলে দিয়ে গেলো ভালোবাসা, শপথ, মমতা-
পরে' নিলো শনিবারে চেতলার হাট থেকে কেনা
নতুন গামছার মতো রঙ্‌দার উজ্জল প্রণয় ।

ভালোবাসা, ছিলি রাতের উর্মিমালা
ফস্ফরাসের উজ্জল উষ্ণীষ —
ভালোবাসা, হলি দহন দুঃখজ্বালা
সহমরণের তীব্র শঙ্খবিষ !

এসো, ভালোবাসা, লোহা হৌও, এ-আগুনে
শ্মশান-অশ্রুটি শরীরকে করো শুদ্ধ
এসো, ভালোবাসা, হরিনাম শুনে শুনে
ধমনিতে আর বিষ নেই অবরুদ্ধ ।

এসো, ভালোবাসা, স্বপ্ন দেখার ক্লাস্তি
এইবারে শেষ । এসে গেছে বিশ্রাম —
অচিরেই পাবে সুষম শূন্যে শান্তি —
এসো, ভালোবাসা, এইখানে পুন্নাম ॥

স্মৃতির ছড়া

স্মৃতি আমার চডুইপাখি, বেড়ালছানা —
স্মৃতি আমার পাড়া, আমার বাস্তবভিটে
স্মৃতি আমার কাজলাদীঘি, শিউলিতলা,

স্মৃতি আমার চড়কমেলা, ছগ্গাবাড়ি
স্মৃতি আমার উঠোন, দালান, ছাদের সিঁড়ি
স্মৃতি আমার মা-বাপ, আমার চোদ্দপুরুষ
স্মৃতি আমার চক্ষু কর্ণ জিহ্বা নাসা
স্মৃতি আমার সূর্য চন্দ্র নবগ্রহ
স্মৃতি আমার ক্ষিত্যপ তেজমরুৎবে্যাম্ ।

ইন্দ্রসভায়

না হয় ফাটলো দুম্‌দাম্‌ দুটো বোমা
খসে গেল এত জরুরি দখিনহস্ত
আছে তো বাঁ হাত, দুটি শ্রীচরণ আস্ত,
ইন্দ্রসভায় নেচে যা, তিলোত্তমা ।

আছে চোখ কান নাসিকা রসনা দন্ত
রয়েছে বিশ্বজগৎ অনাঘস্ত
নেড়ে চেড়ে ছাখ্‌ ঝুলিভরা সম্পত্তি
ইন্দ্রসভার হারিয়েছে একরত্তি !

রথযাত্রা — ১৩৭৯

এবারে রথের দড়ি পশ্চাতে ফেরাও সারথিরা
উন্টোরথের পালা শুরু ।
শেষ হোলো বৎসরান্তে একমাএ প্রতীক্ষিত ক্রীড়া
স্বজন মিলন সব সারা
এবারে পিছনটানে রথচিহ্ন চিনে চিনে ফেরা ।

সমবেত পুণ্যাথী স্বজন
একটি ঘোষণা আছে । অল্পগ্রহপূর্বক এখন
এ্যাবাউট টার্গ করে নিন । অতঃপর
গর্তগৃহে পুনর্বাসী হবেন ঈশ্বর ।

বালভাষিতম্ / শ্রাবণ ১৩৮৫

যখনি তোমাকে দেখি
আমার বুকের মধ্যে নির্বাসিত সেই
গৃহহারা, পথবাসী, তিন সন্ধ্যা অভুক্ত বালিকা
ভীষণ গোলমাল শুরু করে
জটা চুলে লক্ষ লক্ষ উকুন কামড়ায়
তেলহীন চামড়া ফেটে আকস্মিক রক্ত ঝরে পড়ে
তখন চীৎকারে তার কাকপক্ষী বসে না পাড়ায়
কেবল তোমাকে দেখলে
কেবল তোমাকে দেখলে
বুকের গহনে সেই বোধশূন্য উলঙ্গ শিশুটা
সব ধুলো খেলা ফেলে দিয়ে
'দাও, ভালোবাসা দাও'—বুভুক্ষু চীৎকার ক'রে
ডুকরে কৈদে ছ'হাত বাড়ায়—

সেই শুনে সঙ্গী সাথী পথবাসী কুকুর, কাকেরা
কাড়াকাড়ি খেলা বন্ধ ক'রে
আস্তাকুঁড়ে ছ'মিনিট স্থির হ'য়ে থাকে ॥

স্বগত

সেতুগুলো ভেঙে যাচ্ছে ?
নাকি ভেঙে ফেলেছি নিজেই ?
চোখের মণিতে কিছু সংক্রামক অস্থি করেছে ?
সাক্ষাতে কাছের লোকও অকস্মাৎ
দূর হয়ে যায় । বড়ো অস্পষ্ট দেখায় ।

আমি কি বিদেশে আছি ?
অথবা কি আমিই বিদেশ ?

তোমরা কি সেতু ভেঙে
নৌকো পুড়িয়ে দিয়ে আদিগন্ত দেশে ফিরে গেলে ?
নাকি দূর প্রবাসে বেরুলে ?

চোখের মণিতে কিছু অশ্রু কରେছে—
নাকি বুকেরই গহনে সেই রোগ ?
পৃথিবীর কী-যেন হয়েছে—
প্রতিদিন ঘুচে যায় অভ্যস্ত প্রভেদ
বাসা, ও প্রবাসে ।
অবিরল, বাঁচা, না-বাঁচায় ॥

একেকটা খবর আসে ॥

একেকটা খবর আসে, শুনতে পাই—
কি রকম বিযুক্ত, সূদূর
যেন তেরোনদীর ওপার থেকে
ভেলায়-ভাসা বিনিম্বতোর রূপকথা, অথচ
আসলে তো বুকেরই গভীর থেকে ওঠা
হৃৎপিণ্ডের টরে-টঙ্কা, এস্ ও এস্ !
খবর শুনে কেমন যেন করতে থাকে বুকের ভেতরে ।
একটু তোলপাড়, একটু বুঝি ধু ধু, একটু দাউ দাউ—
বুকের মধ্যে ঠিক এমনি ধারা হয় :

পেরতে প্রবল ভূকম্পন—অগ্ন্যুৎপাতে
ধূলিসাৎ হয়ে গিয়েছে কুড়ি লাখ মানুষ অন্ধ্র মহানগরী
কিম্বা স্নাইটজারল্যাণ্ডে গ্লেশিয়ার নেমে এসে
একরাতিরে ধবধবে করে মুছে দিয়েছে
তিনতিনটে ছবির মতো পাহাড়ী গ্রাম—
অথবা, এ-গর্তে সে-গর্তে একশোকুড়িজন বুদ্ধিজীবীর শরীর
পাওয়া গেছে বুড়িগঙ্গার ওপারে—

তোমার চিঠির খবরে
 তেমনি মাইলের পর মাইল ছ ছ করা
 ঝোড়ো বাতাস
 বুকের খুপারির মধ্যে হঠাৎ আটকা পড়ে
 ভয়ঙ্কর গজরায় ।
 বুকের খাচার মধ্যে
 হাহাকারকে পোষ মানাতে শিখে গেছি,
 “বোস্” — বললেই ঠিক বসে পড়ে
 শেকলে-বাঁধা চিতাবাঘ ।

এছাড়া.

বুকের মধ্যে, খুব ভেতরদিকে, গোপন ট্রেঞ্চ খুঁড়েছি
 আর সামনে তুলে ফেলেছি শক্ত ব্যাফ্ল ওয়াল
 বোমার সময়ে যা-যা বিশেষ জরুরি —
 তাদের আড়াল থেকে ঘাপটি মেরে লক্ষ্য করছি
 নিজেরই ভিটে মাটি-চাটি হয়ে যাচ্ছে —
 আর বলছি :
 “আহা! কাদের ঘরে এতোবড়ো সন্ধানাশটা
 হয়ে গেলো গো !”

অয়মারস্ত

নতজানু বসেছি দুয়োরে —
 ফিরে নাও ঋতুর সস্তার
 নদী ফুল পাখি
 কোথাও রেখোনা কিছু বাকি
 ফিরে নাও যতো দিশেহারা
 সূর্য চন্দ্র তারা ।

ফিরে দিয়ে জগৎ সংসার

ঋণমুক্ত ভোরে

গোল হয়ে ঘুরে যাবো

জন্মের প্রথম প্রহরে

তারপরে শুরু হবে দিন

মরীচিকাহীন ।

যত্নবংশ পালা ॥

দর্শকবৃন্দ, আসন গ্রহণ করুন, আলো এবার নিবছে ।

সাজসজ্জা প্রস্তুত, মঞ্চসজ্জা শেষ, আসবাবপত্র

অপেক্ষমাণ, অভিনেতাদের প্রবেশ ঘটবে,

বাঁশি বেজেছে, পাদপ্রদীপ জলেছে, ঘর

অন্ধকারে তলিয়ে গিয়েছে ।

মাননীয় দর্শকবৃন্দ, আপনারা ধূমপান বন্ধ

করুন, পর্দা এইবার উঠছে :

ষাদবের পাদপদ্মে লক্ষ্যস্থির করেছে

নিষাদ ।

পিতৃপুরুষদের উদ্দেশে

বড়ো বৈঠকখানাটা রাত্রে পেরুতে ভয় করতো—

ঝাড়লগ্নন যখন জলতো না, ঘর-জোড়া অন্ধকার

ভেদ করে তাকিয়ে থাকতো সারিবন্দী ঝকঝকে চোখ

পিতামহদের ।

-নড়ে উঠতো কারো কাঁধের শালের ভাঁজ
 লাঠির হাতলে দাঁত দেখাতো রূপোর বাঘ
 যেন সবটুকু অজ্ঞানে গিলে ফেলতো
 উঁচু উঁচু তেলরং অন্ধকারে যুগান্তরের উদ্ধত তর্জনী ।
 বুকের মধ্যে হাতুড়ির ঘা —
 চুরি-করা তেঁতুল-ছড়া, লুকিয়ে-পড়া মোহন সিরিজ
 নিমেষে বে-আক্ৰ হোতো —
 চোখ বুজে একদোড়ে পেরিয়ে যেতুম অন্তরের দিকে-
 হে পিতৃপুরুষ সকল !
 এতো বড়ো বৈঠকখানা পার হয়ে যাচ্ছি
 এই ঘনকৃষ্ণ অন্ধকারে কি তোমাদের শাদা চোখ
 একবার ঝলসে উঠবে না ?

জলের অনেক নীচে

জলের অনেক নীচে খেলা করি, শর্তহীন, একা
 সেইখানে পৌঁছবে না খাজনালোভী সমাজ পেয়াদা
 জলের অনেক নীচে সৌজন্তের দুঃখ স্থখ নেই ।

জলের অনেক নীচে দিতে পারি নিঃসঙ্গ সাঁতার
 আশ্চর্য বর্ণিল ফুলে হয়ে পড়ে জলজ উদ্ভিদ
 সাবলীল লুকোচুরি মাছেদের খিড়কি বাগানে ।

উপরে এসেছে ভেসে বাষ্পতরু ছ'এক বুদ্বুদ
 এই সব বুদ্বুদেরা স্বপ্ন আয়ু । ফেটে ফুটে গেলে
 জলের উপরে কেউ কখনো জানে না কোনোদিন
 -শর্তহীন, সঙ্গহীন, অন্তরীণ ভালোবাসা-খেলা ।

আমাকে তবে গ্রহণ করো, কলকাতা

এবার আমাকে তবে গ্রহণ করো, কলকাতা,

আমিই তোমার প্রেম, তোমার পৃথিবী ।

বু্যহ ভেঙে এই তো ফিরেছি, ‘মৃতবৎসা, সমাগরা’,

শূন্যকোল, অথচ দুধের ভারে অবনতস্তনী

এই ঢাখো তলহীন লবণাপুরাশি ছুই চোখে ।

এসো তবে, চেয়ে ঢাখো, কৌমার্য সন্ধ্যাস্বর্ষ হয়ে

কপালে জলছে দীপ্র

ছুঁয়ে ঢাখো নবনীততলু— আজ তোমারি সম্পদ—

আমাকে তবে গ্রহণ করো, কলকাতা,

তোমার বিরহদশা ঘুচলো এবারে

যেমনটি চেয়েছিলে, অবিকল তেমনি ফিরেছি ।

তবে কেন রুদ্ধবাক — শুদ্ধদৃষ্টি, — কেন বিহ্বলতা,

মুখ তোলো, চেয়ে ঢাখো, সরিয়ো না চোখ

প্রার্থনায় সাড়া দিয়ে এই যে এসেছি

আমিই তোমার সেই চির-আকাজক্ষিতা

বালাসখী, পুরাতনী শিখা !

ঘরবসত

সমস্ত আসবাব বিকিয়ে দিয়েছি

এবারে ঘরখানা দেখে নিন

মেপে নিন দৈর্ঘ্যে প্রস্থে উচ্চতায়

ভালো করে পরখ ক’রে নিন মার্বেলের জাতকুল

ঘরের পরনে আর বেনারসী নেই, গদিমোড়া আসন পিয়োনো,

রবিবর্মী, জ্যাঠামশায়ের বাঘছাল, — কিছু নেই—

এখন পরনে শুদ্ধ দক্ষিণে বাতাস, পুবে রোদ ।

দেখে নিন খোলা মেলা

ভেতর পর্যন্ত ইঁ করে দিচ্ছি

দেখে নিন পেটের গহ্বর, বুকের মেশিনরুম,

গোপন যন্ত্রপাতিসমূহ —

দেখুন একজোড়া চড়ুই কেমন ঘুলঘুলিতে

সিলিং ফ্যান খুলে নিচ্ছি

খুলে নিয়েছি ঝাড়লঠন, বিজলি পেঁয়াজ

এখন দেখুন ছাদখানাও কেমন পরিষ্কার,

ঠিক যেন মেঝে —

এইবার ঘরখানা চিনে নিন,

বাদ দেবেন না আনাচ কানাচ

ঝুলঝাড়া নিয়ে খুঁচিয়ে দেখুন কডিকাঠ

ছেঁড়া খোঁড়া দড়িদড়ার ফাঁসটা এখনো

ঝুলছে টুলছে নাকি

বেশ করে চোখ বুলিয়ে নিন

খোলা মেলা উদ্যম ঘরটায় —

এবার বলুন

কলি ফেরালেই কি বসন্ত চলে ?

একক পুরাণ

দু'হাত বাঁড়িয়ে বললুম :

— “কে আছে ? কোলে নাও ।”

তুমি কোলে নিলে ।

কিন্তু আমি ক্রমশ বামনের অনাগত ত্রিপাদ

আমি উত্তরোত্তর পবনপুত্রের অমোঘ অনড় পুচ্ছ

আমি / তোমার কোল ছাড়িয়ে...

বুক মাড়িয়ে...পাঁজর গুঁড়িয়ে...
দুর্বার ছড়িয়ে পড়লুম
বিশ্বত্রাস্কাণ্ডে রেণু রেণু হয়ে মিলিয়ে গেলে
তুমি
আমার প্রথম ও একমাত্র
আশ্রয় ।

এখন সব দরোজা, সব কোল
আমার পক্ষে
থুব ছোটো হয়ে গিয়েছে
এখন
কক্ষচ্যুত অনিকেত আমি
মহাশূন্যে অগ্নিস্কর
মোকাবিলা করছি ঘূর্ণ্যমান গ্রহনক্ষত্রের সঙ্গে
একা...

এ ধরিত্রী সূর্যগর্ভা

জলে যায় । মাটির ভিতরে অগ্নি অখণ্ড জলং ।
খুঁড়ে খুঁড়ে খুঁড়ে
যতো নিচে যাওয়া যাবে
প্রথমে ফস্কর ধারা —
তারপরে অগ্নিকুণ্ড, অনির্বাণ, অনির্বাপনেয় ।

মাটির ভিতরে জল
সে-জলের অন্তরে আগুন
বেশি দূর খুঁড়ে ফেলা হ'লে
ধরিত্রীও সূর্যগর্ভা ।

জলে যায় । মাটির ভিতরে মাটি জলে যায়
জলের ভিতরে জল জলে যায়
শূন্যের গভীরে শূন্য অথও জলং ।

দিগ্বিজয়ের রূপকথা

রক্তে আমি রাজপুত্র । হলেনই বা দুঃখিনী জননী,
দিগ্বিজয়ে যেতে হবে । দুয়োরাণী দিলেন সাজিয়ে ।
কবচকুণ্ডল নেই, ধনুক তুণীর, শিরজ্ঞাণ
কিছুই ছিল না । শুধু আশীর্বাদী দুটি সরঞ্জাম ।

এক : এই জাদু-অস্ত্র । মরুপথে সেই হয় উট.
আকাশে পুষ্পক আর সপ্তভিঙ্গা সাজে সিন্ধুজলে,
তেপান্তরে পক্ষীরাজ । তার নাম রেখেছি : 'বিশ্বাস ।'
দুই : এই হৃদয়ের খাপে ভরা মন্ত্রপুতঃ অসি
শানিত ইস্পাত ঋণ । অভঙ্গু । নাম : 'ভালোবাসা

নিশ্চিত পৌঁছবো সেই তৃষ্ণাহর ঋজুরের ঘীপে ॥

হাইওয়ে ট্রাফিক

অবিরল ট্রাফিক লাইটে ঠোঁড়র খেতে খেতে
গন্তব্য যে পদে পদে পালিয়ে যাচ্ছে, প্রভু !
আমি এইভাবে চলতে চলতে, থামতে থামতে,
দিশা হারিয়ে কোন্ পথে যে যাই—
যে দিকে তাকাই
লাল সবুজ হলুদ রঙের ধূর্ত নির্দেশ

মোড়ে মোড়ে ইশারা করছেন দয়াময় দেবতাগণ
 বিভিন্ন মুদ্রায় ভারতনাট্যম চলছে
 নটরাজ বরাভয়ে কোমল, অথবা নিষেধে স্কঠোর
 এমন করে কি জীবন কাটে, প্রভু !
 কেউ কি কখনও কোনওখানে পৌঁছুতে পেরেছে
 এইভাবে ত্রেক কষ্তে কষ্তে—
 হাইওয়ের আকাজক্ষায় পাগল হয়ে উঠেছি, প্রভু !
 একটিবার সুপার হাইওয়েতে উঠে পড়তে পারলে
 এই সব শহরে গলি, আর হাটুরে ভিড়.
 এই গুঁতোগুঁতি, লাল নীল জটিল ইশারা
 অবোধে ছাপিয়ে আমি এক গতিময়
 শুদ্ধতায়, পরিচ্ছন্ন শূন্যতায়
 পৌঁছুতে পারবো— একবার মুক্তি পেল
 জীবনের হাইওয়েতে আমি নির্বিঘ্নে
 ছইল ধরে বসবো, আমি দেখে নেব তখন
 আমার গন্তব্যটা আর দিগ্বিদিকে পালাবে কি করে

ঝড়ের গল্প

অগ্নিপিশুর ঘূর্ণি তাণ্ডবে
 নিয়েছে শুষ্ক যতো দীঘির জল
 করাতকাটা ক'রে কেটেছে মহীরুহ
 নিমেষে ছায়া হারা বনস্থল

হাজার পদছাপে জলছে পোড়াভিটে
 উড়েছে ঘরদোর গৃহস্থর
 কোথায় কতো দূরে ফেলেছে ধানগোলা
 রান্না ঘরে হাসে তেপান্তর

হায়রে এভাবেই নোয়াবে পায়ে মাথা,
এই কি রাজবেশ, রাজেশ্বর ?
কেবল খাড়া রেখে একটি পাকা বাড়ি,
তোমারই মন্দির, অতঃপর !

আরণ্যক

মা, আমার বনবাস সমাপ্ত এখন
মা তুমি শ্মশ্রু গুম্ফ জটা ছেনে ফেলে
চিনে নাও কৈশোরের মুখ
চিনে নাও দুধের বালক
মা তুমি বৃকের বাস খুলে দাও, ঢাখো
সপ্তধারা স্তম্ভস্থধা মুখে ছুটে আসে-কি-না-আসে ।

ঢাখো, মা, যে-পায়ে বাজতো সোনার নূপুর —
কেমন বিক্ষত, ছিন্ন, কাঁটায় কাঁটায়
কী রক্ষ, কীণাক্লিত সেই বাছ, যেখানে তোমার
কবচ পরিয়েছিলে, মস্ত্র পড়ে, জন্মের সময়ে ।

মা, ঢাখো আমার বুক, যেখানে তোমারি হাতে পোতা
হৃদয়ের চারা ছিলো খোলামেলা সবুজ দুর্বায়,
সেখানে প্রচ্ছন্ন গাঢ় অরণ্যের আবির্ভাব
এখন মাংসান্ধী ডালে, দস্তুর পাতায়, সর্বভুক
জটিল জিহ্বায়, কেমন বাড়ন্ত হয়ে, বাঘের মতন
সেই বৃক্ষ অগ্ন্যাগ্নের হৃদয় চিবোয় ।

মা, আমার বনবাস সমাপ্ত এখন,
এবারে বনের বাস
আমার ভিতরে ।

দরিদ্র ভাণ্ডার

আশ্চর্য কিছুই নয়, ক্ষিতি অপ্ তেজ ময়্যৎ ব্যোম
আশ্চর্য কেবল এই রক্তের নিনাদ
ভূকম্পনের মতো নড়ে-ওঠা সূর্যকলেবর
সূর্যের পায়ের নীচে অফুরান বিশাল জমিন্
চিরে যায় চিলের ডানায়
উঠে আসে আগুন, পাতাল,
আশ্চর্য কিছুই নয়, অহনি অহনি
পরম আশ্চর্যের দিকে অন্ধ ছুটে চলা
আশ্চর্য কিছুই নয়, রৌদ্রের কলহ আর জ্যোৎস্নার উত্তাপ
আশ্চর্য কিছুই নেই সময়ের দরিদ্রভাণ্ডারে —
ইন্দ্রিয় নশ্বর ।
আশ্চর্য কেবল এক অদৃশ্য নিব্বার । —
কোথা হতে উৎসারিত হয়
এই বিশ্বাস, বিষাদ, —
এই হৃদয় বিষ্ময়,
এই প্রণয় প্রবাদ ?

ট্রাপিজ

লক্ষ্যস্থির করা আছে, অথচ এ তীরন্দাজি নয়
এ তো ট্রাপিজের খেলা
দূরে কাছে দূরের দোলন ।
অথচ, এ সূত্রহীন নিরালম্ব টানা ও পোড়েনে
কিছুই হবে না বোনা ।
শুধু মহাশূন্য কেটে অবিরাম সর্পিলাবলন ।

এবং যেহেতু নিচে, বহু শূন্য পার হয়ে, নিচে
উর্ধ্বমুখ, রুদ্ধশ্বাস, সংখ্যাহীন দর্শকের ভিড়
এবং নাইলনজাল পাতা নেই সভার সৌষ্ঠবে,
সাবধান ! হাতের মুঠো হয়ে যাক লোহা
চরণে মরণ ঠেলে ফ্যালো ।

চোখেরই নৈপুণ্য নয়, এই লক্ষ্যভেদে
সর্বান্তে দক্ষতা চাই । মৃত্যুপণ করে দড়িখেলা ।
আলগোছে ছুঁয়ে থাকা
ছন্দোবদ্ধ স্পন্দিত ত্রিকাল ।

সেভেন ফোর সেভেন জাম্বোজেট

এই যে উথালপাথাল সময় ফাটছে ঘড়ি
দিবসরাজি ঘুচে মুছে হলো সরলরেখা
তীরবেগে ছুটে পালায় পৃথিবী লাগাম ছিঁড়ে
থেকে থেকে নাচে রূপোলি ডানাতে সোনার শিখা
নীল ছুঁয়ে ও কে ? মরিশাস দ্বীপ ? একলা শুয়ে ?
কখনো ভাসছি কখনো ডুবছি শূন্যে একা
নেই কিছু নেই ডাইনে কি বায়ে ওপরে-নিচে
যতাবার চাই দেখি এ শূন্য নাম না-জানা

কলকাতা, তুমি আছো কি এখনো গঙ্গাতীরে
গুটিমুটি শুয়ে হাওড়াতীরের কোলটি ঘেঁষে ?
ঢাকুরিয়া লেকে, সন্ধ্যাসূর্য, বরের সাজে
কিশোরী দেখতে এখনো কি রোজ বেড়াতে আসো ?
আরো কতো দূরে যাবে এই পথ আকাশ ফুঁড়ে
গড়িয়াহাটার পরের স্টেপেই ইম্পাহান —

এ কী এল্ বাসে ননস্টপ ছুটি রুদ্ধশ্বাস
পথের ছ'ধারে সারি সারি মেঘ, স্বাইস্কেপার

কৈশোর ! সে তো পিছু-হটে যাওয়া শ্যামল রেখা
এখানে অপার অমেয় আকাশ কেউটে-ফণা
দশ দিশি ঘিরে সবল শূন্য প্রবল বেগে
ছোবল বসাতে ছুটে আসে বুকে, বঙ্গমূলে —
গতি নেই, নাকি যতি নেই কোনো, ছিন্নবাধা
যৌবন, মহাযৌবন কাঁপে ভীষণ জেদে

আরো কতোকাল দূর থেকে শুধু অমিতদূরে
অবিরল তোকে ছেড়ে যেতে হবে রে কলকাতা !
উঠি-পড়ি-নাচি বিপুল বৃত্তে মরুৎ ব্যোমে
পায়ের তলায় নেই জমি নেই বিপুল ফাঁকা
বুঝি না সত্য নাকি এ মিথ্যে মরা কি বাঁচা
আরো কতো দেরি, আরো কতো দূরে টার্মিনাস ?

তিলাজ্জলি

[স্বর্গীয় অতীন্দ্রনাথ দত্ত স্মরণে]

— ‘আমার মায়ের কাছে আমি ফিরে যাবো ।’
হে পর্বত, হে অরণ্য, পুণ্যতোয়া নদী —
হে সপ্তর্ষি, অরুন্ধতি ! হে ধ্রুবতারকা !
তোমরা সাক্ষী থাকো আমার যাত্রায়
তোমরা সঙ্গী থাকো আমার যাত্রায়
আমার মায়ের কাছে আমি ফিরে যাবো ।

হে পিতা, হে জ্যোতির্ময় নক্ষত্রমণ্ডলী
আমার মায়ের কাছে আমি ফিরে যাবো
হে জননী, হে কল্যাণী, পৃথিবী আমার—
তোমার গর্ভের মধ্যে আমি ফিরে যাবো
জ্যোতির্ময় বীজ হয়ে, নক্ষত্রের ভ্রম হয়ে আজ
আমি ফিরে যাবো ।

হে পর্বত, হে অরণ্য, পুণ্যতোয়া নদী—
অঞ্জলি গ্রহণ করো আজ,
আমার সর্বস্ব আমি তোমাদের সমর্পণ করি ।
মধু বায়ু, মধু জল, মধুর ধূলিতে
অগ্রহায়ণ আমি তোমাদের উৎসর্গিত করি ।
জন্মান্তের পুণ্যফল এই জন্মদিন
তপ্ত হও ত্রিভুবন, তপ্ত হও সকল পুরুষ

আমার নিজস্ব বলতে শুধু জন্ম শুধু জন্মদিন
আমার সর্বস্ব বলতে শুধু জন্ম শুধু জন্মদিন
পূর্ণ থেকে পূর্ণ নিলে শুনেছি তো পূর্ণ বাকি থাকে
হে পর্বত, হে অরণ্য, পুণ্যতোয়া নদী
এখন আমাকে তোমরা যে কোনো বেনামে ডাকতে পারো
পবিত্র, বা অপবিত্র হই,
পুণ্ডরীকাক্ষের নামে জন্মদিন ফিরে দিয়ে আমি
ভিতরে-বাহিরে শুচি

নতুন জন্মের মধ্যে মা'র কোলে ঠিক ফিরে যাবো ॥

যদি-১

ছুতো করে ভালোবাসা যদি ফিরে নাও
চন্দ্র সূর্য গ্রহ তারা দূর করে দেবো
কবিতা লতার মূল উপড়ে ছিঁড়ে নিয়ে

চিরতরে ছাইগাদায় গুঁজে দেবো স্বপ্ন
 ভালোবাসা যদি ফিরে নাও
 তোমার এ পঞ্চভূত লগ্নভণ্ড করে দিতে পারি
 ঋতুর পসরা তুলে
 হাতে হাঁড়ি ভেঙে দেবো চালাকি তোমার
 মিথ্যে নামে জালিয়াতি কারবার চালানো
 সে তো জগবন্ধু নয়, জগৎশত্রুতা যার কাজ !

এই বলছি, ভালোবাসা যদি ফিরে নাও
 তোর ত্রিভুবন আমি ছোট্ট হুড়ি পাথরের মতো
 যে-কোন ঝালের জলে খুব জোরে
 ছুঁড়ে ফেলে দেবো
 তোমাকে পাবে না খুঁজে তোমার গ্যাণ্ডটারা আর
 জন্মের মতন ।
 ভালোবাসা ফিরে নিলে খুব অনায়াসে আমি
 এইসব অনাসৃষ্টি পারি ।

যদি-২

যদি ফিরে নাও ছলেবলে ভালোবাসাটি
 একটানে খুলে ছিঁড়ে নেবো টাঁদ স্রমিয়া
 পদাঘাতে গুঁড়ো করে দেবো সাত স্বর্গ
 যদি ফিরে নাও ভালোবাসা, তবে ঘোচাবোই
 ছয় ঋতু জুড়ে পাঁচটি ভূতের নৃত্য
 শক্ত রবারে দুঃখ বুলিয়ে নির্ঘাৎ
 ঘষে মুছে দেবো পেনসিলে আঁকা পৃথিবী
 আকাশের গায়ে বুলবে কেবলই শূন্য —
 এবং বুলবে দুঃখী শূন্যস্রষ্টা ।

সে কি ভালো হবে ? এত কষ্টের সৃষ্টি ?
 তার চেয়ে ধরো দু'হাতে — জড়াও দু'হাতে —

ঝোঁপে ঢেকে রাখো ভালোবাসা মায়ামমতায়
সেখানেই তুমি, সেখানেই চাঁদ সূর্য্য
সেখানেই তুমি, ভালোবাসা সাতস্বর্গ—

সৃষ্টিকর্তা, সেখানে তোমারও মরণবাঁচন প্রশ্ন ।

নিমফুল

হাতের মুঠো খুলে
খুঁচরো ভালোবাসার পুঁজি কে নিয়েছিস তুলে
অবাক সরোবরে
গন্ধবিহীন পদ্ম থরে থরে ।
(কেউ দিবিনে বাধা—
আমার বাক্স-বেড়িং বাঁধা
ছিন্ন কলরোলে
আমি যাবোই যাবো চ'লে)

আঁচলা-গেরো খুলে
কে নিয়েছিস স্বপ্ন স্মৃতি সব নিভৃতি তুলে
পত্রবিহীন বনে
উলঙ্গ ডালপালার নৃত্য শূন্য সমর্পণে ।
(কেউ দিবিনে আড়ি
আমি যাবোই যাব বাড়ি)
আকাশ বাতাস তেতো
এই বসন্তে নিমফুলে ফুল নিমফুলে ফুল ভেতর ।

গঙ্গাসাগর

বাঁ দিকে নিঃসীম দূর
ডান দিকে মনসার দ্বীপ
আমি কোন্‌দিকে যাবো ?

তুমি মোহনায় আছো
আমি মোহনার দিকে যাই ।

কুন্তির গেরুয়া স্রোতে আম জাম কাঁঠালের ছায়া
পার হয়ে এইবারে ছায়াহীন গৈরিক সাগর
নিরবধি গহন পাথার
নিরবধি আগ্নেয় আকাশ
এবার এইখানে তুমি ।

নির্মম গুনশির চর ডুবে যায় জোয়ারের জলে
মজ্জমান সমর্থ বৃক্ষেরা
ও-দ্বীপে মাটির নিচে রাজার ঐশ্বর্য বহে যায়
মাটিতে প্রহরী চরে । পালে পালে দাঁতাল শুয়োর
ও-দ্বীপ তোমার দ্বীপ নয় ।

তুমি জলছিটে দিয়ে মধ্যাহ্নসূর্যের চোখ পুয়ে দাও
বাতাসে চন্দন মেখে রাখো
আকাশ আনত হয়ে তোমার ব-দ্বীপ ছেয়ে রাখে
আমি ঘোমটার ফাঁকে কী সহজে উঠোনে তোমার
অন্তরীণ নিঃসীমতা ছুঁই ।

বাঁ দিকে অকূল ব্যাপ্তি, নীলছায়া রূপোলি সাগর
বাঁ দিকে স্বচ্ছতা কাঁপছে মাছের মতন
দিগন্ত বলয়ে পাখি নেই—
ডান দিকে মনসার দ্বীপ, ধানগোলা, খালজেটি, বলো;
আমি কোন্‌দিকে যাবো ?
তুমি মোহনায় থেকে,
আমি মোহনার দিকে যাই ।

গ্রহাস্তরী

কেউ বলে : ‘তুই ঘুমিয়ে হাঁটিস—

ঘুমের ভেতর হাঁটা,

গায় লাগে না হুঙ্কা আঙুন

পায় ফোটে না কাঁটা’

কেউ বলে : ‘তুই ভূত-পাওয়া লোক

কোঁটিয়ে ঝাড়াই বিষ

ঠিক বেরুবে সংসারী মুখ

জাগবি অহর্নিশ’

কেউ জানে না গোপন হিসেব

কে থাকে কার কোলে

কে যে কাকে আগলে রাখে

ঝঞ্ঝায় বাদলে

কেউ জানে না, সেই যে মানুষ,

অচিন্ গ্রহের লোক

দিন দুয়েকের অতিথ, না তার

স্বখ আছে, না শোক ।

দেখা

নাহয় দেখা না হলো তাতে কী আর আছে ক্ষতি

মনের মধ্যে নিশি দিবস দেখা

বুকের মধ্যে একটা নদী বইছে একা একা

লাজুক সরস্বতী

চেউয়ের পরে ভাঙছে চেউ ঘাটে

মনের মধ্যে চাঁদের তরু বাড়ে এবং কমে

জগৎ কোঁপে জ্যোৎস্নাফুল ঝরে
 জ্যোৎস্নাফুলে বাতাস লেগে দুঃখফল ফাটে
 অনেক দূরে ছড়িয়ে পড়ে ওড়নাপরী বীজ
 না হয় দেখা না হোলো তাতে কী আর ক্ষতি আছে
 এমনি করে নিশি দিবস মরা এবং বাঁচা
 ভস্ম থেকে উজিয়ে ফোটে ম্যাজিক মনসিজ
 অবাক জলে বুকের ঝারি ভরে
 বুকের মধ্যে একটা নদী বইছে নিরবধি
 মনের মধ্যে অন্তহীন দেখা ।

সময় : যৌবনকাল, ঠিকানা : পৃথিবী

কথা ছিল, দেখা হবে ।
 টুকরো টুকরো ত্রিভুজ ও মিনার
 হাতে নিয়ে, প্রেমিক আমার —
 অথগু সময়ে আর অনন্ত জগতে
 আমি পথ চেয়ে থাকবো,
 সেম টাইম, সেম প্লেস —
 সময় যৌবনকাল, ঠিকানা পৃথিবী ।

এই তো যৌবন তৈরি, পৃথিবী প্রস্তুত ।
 ত্রিভুজের ভগ্নাংশ জুড়ে চমৎকার ত্রিভুজ হয়ে গেছে
 একটানে সেতুবন্দী ইহনদী এপার-ওপার
 মিনারখণ্ডেরা সব পরস্পর মিতালী করেছে
 দীর্ঘ স্তম্ভ উঠে গেছে ত্রিভুবন-নক্ষত্রবিস্তার ।

কথা ছিল, দেখা হবে ।
 আমি আছি, প্রেমিক আমার —

অথগু সময় বুঝি বহু দীর্ঘ কাল ।

স্মৃতির মতন বর্তমান

কী নেবে ? কী দিতে পারি ? বহুদিন পরে দেখা হলো—
চিনির মঠের মতো হাওড়ার ব্রীজ ভেঙে এনে
খালাতে সাজিয়ে দেবো ? গঙ্গানদী ছেনে
শ্রোতটুকু চেষ্টা নেবো, হৃৎ থেকে সরের মতন ?
স্মরণবনের হাওয়া ভরে দেবো তালের পাখায় ?
চাঁদের রেকাবি ভরে বেড়ে দেবো রমণী রতন ?
কী নেবে ? কী দিতে পারি ? অফুরান প্রেমিক আমার—

চুলে বিলি কেটে যায় জ্যোৎস্না, তৃণ, স্মৃতির মতন হাহাকার
চেয়ে দেখি প্রিয় মুখ, বহুদিন পরে দেখা হলো,
কোজাগরী চন্দ্রাতপ মাঠ ভরে বাসর সাজায়
হাত পাতো, রাজি চলে যায়—
বলো, কিছু বলো—

যতোদিন দেখা নেই, ততোদিন চিতা পেতে শুই—
ততোদিন এই মাটি, এই আলো. বিদেশ বিভূঁই ।

মানস গঙ্গোত্রী-১

চুলের মধ্যে চুইংগাম হয়ে আটকে আছে চোদ্দ বছর বয়েস করতলে কৈশোর
ভুরু বেয়ে গলে পড়ছে চাঁদের মোম যোগফল : শূন্য স্বপ্নের সঙ্গে স্বপ্নের
যোগফল : শূন্য—যেমন বাতাসের সঙ্গে শিশিরের চোখের ভেতরে চোখ জুড়ে
চোখ জোড়া ধুলায় বিছানো

শ্রাম অঞ্চলে দাঁড়াও হে নাথ.....

একে কি ভালো বলবো একে কি বাসনা বলবো মাথার ভেতরে এই অরণ্য
প্রান্তর বৃকের ভেতরে এই ষাট মাইল...নির্জন, নির্যাস...মঞ্জরিত শালবীথি—
চোখালের ভেতরে পর্বত গলার গভীরে বালিঘাড়ি মাথার মধ্যে জলপ্রপাত
বৃকের ভেতরে বৃকজোড়া মাঠ চোখের ভেতরে চোখজোড়া চাঁদ নখাগ্রে

নক্ষত্ররাজি করতলে কৈশোর পাঁচ আঙ্গুলে পঞ্চনদে মুষ্টিবদ্ধ কৈশোরের কাম্বা
গলে পড়ে মুক্তিহীন...

মানস গঙ্গোত্রী-২

যাকে ভেবেছিলে গতিহীন

সেই দেখা দিলো স্রোতোবতী কাকচক্ষু

জাগরণ প্রস্তুতিহীন ।

আকাশে বাতাসে ক্ষতিহীন

ছিলো নিশায় দিবসে মিশানো শূন্যপক্ষ

জ্যোৎস্নায় সম্মতিহীন ।

হ'লে হঠাৎ সময় যতিহীন

নিষে শিকড়ে-কুঁড়িতে জুড়ি-বাঁধা একলক্ষ্য

নিমেষে নিহত প্রতিদিন ।

যদি নিহতই হোলো প্রতিদিন

তবে কী ক্ষতি এমন করতো যক্ষ-রক্ষ

যদি সূর্য উঠতো স্মৃতিহীন !

মাৎস্য সঙ্গীত

কবি মশাই, কী যন্তনা ! সামনে যখন আপনি থাকেন

কী আর বলব, বলতে গেলেও যার পরে নাই লজ্জা করে

মার্কিনী সেই পাগ্‌লা কবির বুকের মধ্যে যেমন হতো

রবি-মশাই থাকলে ঘরে । ঠিক অবিকল তেমনি আমার

বুকের মধ্যে ঝাপুর ঝাপুর কেলেঙ্কারি । ঠিক মনে হয়

কাঁধের ওপর হাড়-পাথরের মস্ত মুণ্ডর, বিষম ভারি,

এবং গা-ময় কী দীর্ঘ লোম, কোমর থেকে
 পশুর চামড়া ডুমুর পাতার বদলি ঝোলে,
 দশ আঙুলের দশখানা নোখ ভর্তি কেবল
 রক্ত, মাটি, নোংরা, ধুলো — আজাহু পাঁক ।
 যতক্ষণ না পালিয়ে বাঁচি স্বস্তি উধাও বিষম জালা ।

আপনি হঠাৎ সামনে পড়লে ঠিক মনে হয় এই আজীবন
 ওহায় ছিলুম । হামাগুড়ি, দুইহাতে হাড় চুমছি এবং
 কব্বে বেয়ে লাল রক্ত, লালা — সেই ভাবেতেই পৌঁছে গেলুম
 — কোথায় ? না ঠিক তাজমহলের মাঝমহলে !
 কিম্বা ধরুন দিলওয়ারার মন্দিরটার গর্ভগৃহে !
 কবিমশাই, আপনি যেন মর্মরফুল, সহস্রদল, মার্বেলে ঠিক
 আপনি-ফোটা শ্বেতকমলের মতন নরম, কী সাবলীল,
 পাথর কুঁদে মর্মরে ফুল ফুটিয়ে তোলা নৈসর্গিক
 ক্রেশহীনতায়, সহজ তো নয় । সহজ তো নন
 আপনি, মশাই ! শক্ত অমন সহজ হওয়া ।

আপনি যখন সামনে আসেন ঠিক মনে হয়
 এই পৃথিবী পৃথিবী নয় বনজঙ্গল, অগ্ন্যগ্নহ —
 এই আমি আর এই আমি নই, বনমালুখী,
 উদোম, লোমশ, উকুনভরা, হিংস্র, এবং
 দাঁত মাজিনা ।

আপনি থাকেন রেশমী হাসির সূক্ষ্ম জালের অন্তরালে
 দূর বিদেশী, গ্রহান্তরে যোজন যোজন দূর থেকে তাই
 তাকিয়ে থাকা নির্নিমেষে, নয়ন ভরে, জংলী চারার
 যেমন সন্ধ্যাতারার দিকে ধন্য হাসি ।

এমনি আপনি সভ্যভব্য, হায় রে পাঠক ! কী ভবিষ্যৎ !
 বাক্য বলবে সাধ্য কী তার, শূন্যকলস-বাণ-বিচার ?
 তুচ্ছ পাঠক আত্মহারা, উত্তম সম্ভ্রমেই সারা ! দীনাতিদীন !

মাপ করবেন, কবিমশাই ! অভয় দেন তো বহুনি দেই ?
 — কাজ কী এমন হ্রসভ্যতায় ? অমানুষিক অভদ্রতায় ?
 যার তেজে নিম্প্রদীপ কালো স্বার্থবিহীন নেহাৎ ভালোও,
 খাস নিরামিষ ভালোবাসাও ? কবিমশাই,
 এবার একটু অসত্য হোন । এবার একটু অসহ্য হোন ।
 একটু একটু মনুষ্য হোন ? আর কতদিন ঘিয়ের প্রদীপ
 উদ্ভাসিত নবীর মতন পাথর পুষ্প ? পরাগবিহীন ?
 অপাপবিন্দু পরমশুদ্ধ বীজাণুহীন ? আর কতকাল
 স্তম্ভ কমাল নাকমুখে ব্যান্ডেজের আড়াল ? জৈন মুনি ?

তার চেয়ে হোন ভাস্কর্য, এবার বরং
 বাঘের ছালটা আপনি পরুন, এই মুণ্ডটি
 আপনি ধরুন । কবিমশাই, এবার একটু,
 গুহায়-টুয়ায় ঢুকলে হয় না ? একটু একটু
 অসভ্যতায় খুব কি ক্ষতি ? সংস্কৃতির ?
 একটু না হয় নষ্ট সময় শব্দবিহীন অসৌজন্য
 অরণ্যানীর অন্ধকারেই কাটতো অপার,
 কাটতো বহু — কবিমশাই, তাকিয়ে দেখুন,
 নেহাৎ তুচ্ছ তৃণের গুচ্ছ, অধীন পাঠক —
 ইহার জন্ত ?

কাচঘর

১

মধ্যগাঙে জলবন্দী কোনো এক স্ববির স্তিমার
 মাস্তুলে সন্ধ্যার মেঘ বেঁধে নেয় ভীষণ সাহসে
 ভয়ংকর লংকাকাণ্ড শুরু করে দেয় অতর্কিতে
 জলে স্থলে আকাশে বাতাসে
 ছ ছ হাওয়া আমূল আগুন

অতীত উৎসাহ হয়ে যায়
সন্ধ্যালগ্নে কাচঘর জলে ওঠে
অশ্রু বুঝি ঘুতের আহুতি

আকাশ আকাশ ছাই
সারারাত্রি ধরে ধরে পড়ে
কাচ ঘরে
কাচের শহরে

২

কাচের এপাশে এসো, মাটির উঠোনে
শজারু মতো অন্ধকার
ঝিমন্ত গৃহস্থালি নিভন্ত উল্লু
চলন্ত নৌকোর ছায়া বুকে নিয়ে
ডুবন্ত জাহাজ ঘুমন্ত গজার সঙ্গে
আলিঙ্গনবদ্ধ হয়ে থাকে

উর্ধ্বাকাশে মহারঙ্গ
অনন্ত দিগন্ত জুড়ে যুগান্ত-গোধূলি
ছেয়ে ফেলে
কাচের ওপাশ

৩

এইবারে একা হয়ে যাও ।
কাচের এধারে এসো,
কাচের এধারে কেউ নেই ।
শজারুটি মুখ খুবড়ে পড়ে আছে
বাসের উপরে
ঘুমন্ত ? জীবন্ত ? ঠিক জানা নেই—

‘এইখানে সরোজিনী শুয়ে আছে’

সারি সারি বিজলী আলোয়
ট্রামের লাইন-পাতা স্বপ্নের শহরে ।

৪

মধ্যরাত, মধ্যগঙ্গা, হে মধ্যযৌবন
কাচের ওপাশে চলো
কাচের ওপাশে স্থির সবুজ সিগন্যাল
দীর্ঘ ছইসিল মেয়ে ছুটে যায় দীর্ঘ বর্তমান
বুকের পুকুরে তার চলমান দীর্ঘ ছায়া পড়ে

একটি বালিকা তার পাশে পাশে নিত্য ছুটে চলে
কাচের ওপাশে হাসে সবুজ সিগন্যাল
বুকের তলায় তার নিদ্রাহীন লাল
স্তম্ভ অপেক্ষায়

বালিকা জানে না
কিন্তু মধ্যরাত্রি জানে

৫

কাচের ভিতরে কার ঘর দেখা যায় ?
ঘরের ভিতরে কাচঘর —

কাচঘরে বসে আছে
বৈদ্যুতিক যুবক যুবতী
টেবিলের এপার-ওপার
মসৃণ মর্মরথণ্ডে
হাঁসপাখা প্রেম পিছলে যায়

আঙুলে আঙুল ঠুকে
ফস করে জেলে দেয়

যৌবনের চকমকি পাথর
এইবারে ছোটোখাটো অগ্নিকাণ্ড
গুরু হবে ঘরের ভিতর

ঘরের ভিতরে কাচঘর
কাচের ভিতরে কার ঘর দেখা যায় ?

৬

কাচের ওপাশে যাস নি,
বাছা তুই ভয় পাবি, কাচ
ভীষণ রক্তাক্ত করে
স্বতির শরীর
কাচের ওপাশে ঘন
শজারুর মতো অন্ধকার

তার চেয়ে মরীচিকা ধরো —
কাচের এপাশে এসো
এই কাচঘরে
উদ্দাম বাঘের সঙ্গে নৃত্য করে
তরল তৎক্ষণ
এখানে অদ্ভুত আলো
নেভে জলে ছ'চোখ ধাঁধায়

শজারুটি মুখ খুঁবে
পড়ে থাক্ টেবিলের নিচে
মথমল, সবুজ কার্পেট
ভিজ়ে থাক্ পশুর শোণিতে —
সেই ভালো, বাছা তুই
সরে আয়, কাচের এপাশে ॥

৭

কাচের ওপাশে যেও না,
হে মধ্যযৌবন
দপ্ করে জলে উঠবে শূন্যসার আলো
নহবতখানা থেকে নকল শানাই শোনা যাবে
মুহুর্তে উথিত হবে ডুবে-যাওয়া সপ্তডিঙা তরী
বল্‌সাবে হাজার-দুয়ারী রাজবাড়ি

কাচের ওপাশে যেও না
হে মধ্যযৌবন
মায়াপুরী ছিঁড়ে নেবে বুকের শিকড়
জনশূন্য রাজপথ, গৃহহীন অলৌক নগরী
নিঃসীম মরণ আর নিঃসাম স্মরণ

৮

কাচঘরে বহুদিন কাচের পুতুল হয়ে আছি
এবারে বদল হলে ভালো

এসো, জানোয়ার হই—
এসো, জানোয়ার হবো এসো
এই ঢাখো কী সুন্দর পোশাক এনেছি,
লোমশ, কবোফ কোট, পরে নাও গায়ে
এই নাও নখর, শ্ব-দাঁত—

এসো, এইবারে এসো, শুরু হোক নিশায় চারণ
এই গৃহ গুহা হয়ে যাক
এবারে ভীষণ রঙ্গ শুরু হবে বুকে

শুধু এক পলকের
সরে যাওয়া চাই
কাচের এপাশ থেকে কাচের ওপাশে

অনন্ত মধ্যরাত্রি, এ মধ্যযৌবন
নিশায় নেশায় বেশ চরায়-বরায়
কেটে যাবে কাচের পিছনে

কিষা এসো, কাচ ভেঙে ফেলি ;
কাচঘর কে চায় জীবনে ?

বিহঙ্গ

যতই ঘোরো, পথে পথে যতই পোড়ো
হওনা ঝোড়ো-কাকের মত যেমন খুশি
তেমন তরো, ঘরের দিকে যখন ফেরো
তখন জানো জলছে বাতি, পুনঃপাতী ।
পথ পেরুলেই, সঙ্গী সাথী ।

কিন্তু আমি ঘরেই থাকি গুপ্ত রাখি
প্রাণের পাখি । সকল অঙ্গ হয় জ্বিভঙ্গ
মগির বন্ধে জরির রাখী পাকে পাকেই
জড়িয়ে রাখি । কে না জানে জরির দড়ির
সোনার অঙ্গ সোনার শরীর
গেরোয় গেরোয় হই নিসঙ্গ
সোনার রঙ্গ, সোনার ফাঁকি
কাঁদে বিহঙ্গ, খাঁচার পাখি ।

হৃদ

অনেক দিয়েছিস জীবনভর
পথের মোড়ে মোড়ে বাড়ানো হাত
মুকুটপরা এই দরিদ্রের
বাড়ছে দিনে দিনে ঋণের ভার

একদা ঘরে ছিল উৎসবের
রঙিন ফিতে বাঁধা আলতো স্মৃতি
তার বদলে দিলি গ্রহান্তের
বাদামী ধুলোমাখা তেরছা চাঁদ

উঠোন ভরে ওঠে প্রসাদে তোর
যতোই ঝুঁটি নেড়ে দে সাইক্লোন
বাড়ছে তোরি কাছে ঋণের ভার
বুকের মাঝখানে দরদালান

অনেক দেখা হলো, এবারে চোখ
ভীষণ শলা বিঁধে করে দে শেষ
আসে না অধিকারে অধরা ফুল
বুথাই এত দিস দৃশ্যসুখ

এবারে কান দুটো বধির কর
শুনিয়ে দিয়েছিস গ্রহের গান
পাঁজর ফুলে ওঠে, প্রসাদে তোর
ধসে না কিছুতেই দরদালান !

এবারে দুটি মুঠি যুক্ত হোক
অহর্নিশি ধরা ধনুর্বাণ
এবারে ঋদ্ধ জাহ্নু ভগ্ন হোক
সাক্ষ্য হ্রদে নেমে হোক প্রণাম ।

শাস্ত্রত সময়

আধঘণ্টার জন্তে

পৃথিবীতে আর সব অক্ষর ফুরাক

‘ভালো-বাসা’ এই চতুষ্পদে

বর্ণমালা শেষ হয়ে যাক

আধঘণ্টার জন্তে

জগতের আর সব চক্ষুকর্ণ জিহ্বা লোপ পাক

কেবল থাকুক

দুটি জীব, দুটো জিভ্ জগৎ জুড়ুক

মর্মরিত উত্থানপতন

সিস্মোগ্রাহকে ধরা থাক

জন্মের মতন

আধঘণ্টার জন্তে

হে পৃথিবী, থমকে দাঁড়ান

সৌরপিতা, মাধ্যাকর্ষ স্বগিত রাখুন

পাপপুণ্য ঘুচে যাক, মুছে যাক দিবসরজনী

এই মাটি হোক স্পর্শমণি

এই দেহ হোক নিকলুষ

হে কালপুরুষ

আধঘণ্টার জন্তে আপনিও আপনার

চক্ষুতারা সহস্র ঢাকুন

সাক্ষী থাকুন

শুধু শূন্য, ক্ষিতি, বায়ু, জল

অচঞ্চল, আর

অগ্নির মতন অক্ষকার ॥

এসো, খোকাবাবু

এই নাও, আমার মস্ত নীল বেলুনটা
এই হলদে তারা আঁকা নীল বেলুনটা
আমি তোমাকেই দিলুম ।
তুমি তাতে আলপিন ফুটিয়ে দিয়ে
ঝোড়ো হাসি হেসে ওঠো ।
আমি দেখি ।

এই নাও, বাদামী বাতাসার ঠোঙা
আমার এই মাটিজলের শরীর
আমি হরির লুট দিলুম ।
কুড়িয়ে নিয়ে মুখে পুরে দাও,
কিষ্কা টালমাটাল ছপায়ে গুঁড়োও—
আমি দেখি ।

এসো, খোকাবাবু,
এই নাও, আমার সবুজ রঙের মার্বেলটা
আমার শশুশ্যামলা মার্বেলটা
আমি তোমাকে দিলুম ।
তুমি খেলতে খেলতে ছুঁড়ে দাও—
যে কোনো গর্তে
গুটা হারিয়ে যাক ।
আমি দেখি ।

এসো, খোকাবাবু ।

পাগিগ্রহণ

কাছে থাকো । ভয় করছে । মনে হচ্ছে
এ মুহূর্ত বুঝি সত্য নয় । ছুঁয়ে থাকো ।
শাশানে যেমন থাকে দেহ ছুঁয়ে একান্ত
স্বজন । এই হাত, এই নাও, হাত ।
এই হাত ছুঁয়ে থাকো, যতক্ষণ
কাছাকাছি আছো, অল্পষ্ট রেখো না ।
ভয় করে । মনে হয় এ মুহূর্ত বুঝি সত্য নয় ।
যেমন অসত্য ছিলো, দীর্ঘ গতকাল ।
যেমন অসত্য হবে অনন্ত আগামী ।

প্রেম-১

[কবি অরুণকুমার সরকারের সৌজন্যে]

রক্তকিংণুকে জালিয়ে দিয়েছিস
আমার দুই চোখে শীতের বন
ভীষণ অসময়ে বাতাসে বৈশাখী
ভীষণ অসময়ে শুভক্ষণ !

পুড়ছে পুড়ে যায় পাহাড় বনতল
ভয়াল বেগে ছোটো ধূমপুচ্ছ
তোমাকে চাই শুধু তোমাকে বুকে চাই
মুঠোয় ধরেছিস স্নায়ুর গুচ্ছ ।

এখন দিবানিশি ঘূর্ণি দশদিশি
এখন দিনমানে পূর্ণ চাঁদ
এখন সূর্যের গ্রহণ ক্ষণে ক্ষণে
অসম্ভব আর কোন্ প্রসাদ ?

কখন ঘুচে গেছে কক্ষপথরৈখা
কখন ছুটে গেছে গ্রহের তান
এখানে যতি নেই লাভ বা ক্ষতি নেই
পায়ের নীচে ব্যোম চূর্ণ্যমান...

প্রেম-২

কুসুম, ধাতুর রয়েছে কাল
কুকুর-বেড়ালেরও ভাদ্রমাস
আমাকে করেছিস হাড়ির হাল
হতে হয়ে মরি বারোটা মাস !

তেষ্টা ছাতিফাটা, ক্ষান্তি নেই
আয়ুল জলে যায় স্বস্তি, সুখ
তোমাকে ছাড়া নেই শান্তি নেই
অতল জলধারা তোমার মুখ !

তাকাও, চোখে হোক চোখের স্নান —
পেতেছি দ্বারে ক্ষুৎ-ভৃষ্ণ ঠোঁট
ক্ষুধার্তকে দিবি অন্নপান
বাড়িয়ে আন্ তোর জিহ্বা ঠোঁট !

শেষ নাগ

বহুশীর্ষ শেষ নাগ হয়ে
শেষ প্রেম সমুথিত হয়েছিলো ।
একা ? নাকি অনেকে দেখেছি ?

তুষারের স্তম্ভে ঘেরা চিরবন্দী
বিষনীল, তলহীন, শৃঙ্খলিত হ্রদে
চোন্দটি বিদীর্ণ জিব বাতাসে খেলিয়ে
বহুশীর্ষ শেষ প্রেম ফণার ঝাপটে
তুষারে ফুলঝুরি তুলে
ভেসে এসেছিলো
শব্দহীন মোহন বাঁশিতে

কর্পূরের গন্ধে ভারি, হিমেল আলোয়
গা-ছম্ছম্ গুহার গহনে
অন্তহীন স্বরণে, ক্ষরণে
উদ্ভাসিত হয়েছিলো বুঝি
অতি স্পষ্ট, অতি সাময়িক, অতি-হিম, হিমলিঙ্গ—
একা ? নাকি অনেকে দেখেছি ?

কোনো স্বপ্ন-প্রাবণের মুগ্ধ পূর্ণিমায়
প্রচণ্ড যাত্রার অন্তে
পরিশ্রান্ত নয়ন-বিভ্রমে
জ-মধ্যস্থ জ্যোতি হয়ে, তাৎক্ষণিকে
ত্রিকাল ডুবিয়ে
হিমহ্রদে শেষনাগ ভেসে উঠেছিলো ?

মনিব সমীপেষু, বিনয়ী নিবেদন
[কবি অরুণকুমার সরকারের স্মৃতিতে]
বহু দিন হলো পুরোনো পোশাকেই
রয়েছি হে মনিব, এদিকে চোখ দাও
এবারে করে। প্রভু দৈন্ত্য বিমোচন
জীর্ণ বাস ছেড়ে নতুন জামা চাই

কেবলি ছুঁ চ-স্বতো, অসার রিপু তালি
অপার ঢাকাচুকি, ভাইনে বায়ে টান্
নজরে পড়েনা তো একটি বারো প্রভু
ঢাকেনা বুকপিঠ । লজ্জানিবারণ ।

তোমারি দায়, এই সহজ শর্তেই
এসেছি কর্মের অমোঘ বর্তনে
তুমিতো সরকার উদাসী আনমন
এ ছেঁড়া শ্রাকড়ায় চলে কি রাজকাজ ?

অনেক দিন হলো গ্রীষ্মে বর্ষায়
রয়েছি পদতলে বিনীত শতদল
পায়ের ছোঁয়া দিয়ে ফুটিয়ে চলে যাও
পাপড়ি খসে পড়ে, সেদিকে চোখ নেই ?

হেঁকেছে ফেরিওলা সেদিন রাস্তায় —
—“পুরোনো বসনের বদলে দিতে চাই
হিরণ্ময় এক পাত্রে ঢাকা সুখ” —
শুনেছি সেই হাঁক । দোহাই হে মনিব

মেটাও সাধ, হোক লজ্জানিরসন
এবারে কিনে দাও নবীন বেশবাস
খুলি এ ছেঁড়াজামা, অঙ্গে তুলে নিই
আকাশ গ্রহতারি বাতাস মাটি জল

স্লীপ ওয়াকার

[রণজয় কার্লেকরের স্মৃতিতে]

ঘুমের ভিতরে তুমি হেঁটে হেঁটে কতো দূরে গেছ ।

বুকের গুহাতে বুঝি ঘনঘোর ঢাকের ইজিতে

জরুরি তলব এসেছিলো,

: ডিউটি শেষ, ফিরে যেতে হবে ?

ঘুমের ভিতরে তাই হেঁটে হেঁটে কতো দূরে গেছ !

ঘুমের গভীরে আরো নীল ঘুমে

নীলতর স্বপ্নের বাগানে

নক্ষত্রের ভিতর বাড়িতে, নীলাময়

আগ্নেয় পুষ্পের মধো

ফণা তোলা বেগুনী হলুদে ঘোর লালে

কুণ্ডলিত তাম্র-শ্রামে

ধাতব ফুলঝুরি হয়ে

পৌঁছে গেছ স্থস্থির স্বদেশে

চির নিরাপদ ।

ঘুমের ভিতরে কোন্ দীর্ঘতম পথে হেঁটে গেলে

দিকচিহ্নহারা, পদশব্দহীন

রাত্রি নয়, প্রভাতও ছিল না

এ গ্রহের কাজ বুঝি সারা ?

বিদায় নেওয়ার মতো একভিল সময় পেলেনা,

এত তাড়া ছিলো ? স্বদেশে ফেরার ?

বৃহ

[শুদ্ধশীল বস্ম অরণে]

বৃহচ্ছেদ করতে শেখোনি ।

তোরও বুঝি আজন্মের কবচকুণ্ডল

খোওয়া গিয়েছিলো কোনো মধ্যরাত্রে

জন্মযন্ত্রণার নীল রক্তকর্দমে ডুবে গিয়ে ?

কেবল বুকের পাটা, যৌবনের মতিভ্রম,

মৃত্যুর পরাক্রম ছিলো ।

ছিলো না রক্তের জোর ধমনিতে বাকি

অতিরিক্ত মধুশ্রোতে, মধুরাতে, মধুর সিদ্ধিতে

ভেসে গিয়েছিলো সব,

থাকা, আর না-থাকার দীপপুঞ্জ তোরা ।

বৃহচ্ছেদ করতে না-শিখে

বৃহ্মধ্যে ঢুকেছিলি, জেনেশুনে

নিশ্চিত মৃত্যুর গর্ভে রথ নিয়ে

ঢুকে গিয়েছিলি, কোন্ যুদ্ধে ?

কার যুদ্ধে ? অসম্ভব জয়ের প্রত্যাশী ?

জয় নয়, পরাজয় নয়

বরণ হয়েছে মুক্তি

কী দরকার রণে ?

তুই থাক পিতৃপুরুষের কোলে,

নির্ভার, নিদায়—

তুই থাক অনন্ত যৌবনে ।

নিশি-ডাক

সেইসব স্বপ্নের মাঠে ঘাটে
ইদানীং কারা পথ হাঁটে ?

আমি স্বপ্নমত্ত একজন—
চক্ষুহীন, দেখে নিতে চাই
পদহীন ছুটে যেতে চাই
জিহ্বাহীন, বিলাপ জানাই।

রহস্য প্রেমিকা এ মেদিনী
করতালি বাজিয়ে হেসে ওঠে
ঝনঝন কঙ্কন কিস্কিনী
“সময় হয়েছে” বলে দাঁড়ায় চোকাঠে।

স্পর্শহীন, বক্ষের কবাটে
অনিবার্য নিশি-স্পর্শ পাই—

অনড় স্থাবর বৃক্ষ
ঝঙ্কার শীৎকারে সাড়া দিয়ে
একদিন বলে ওঠে—“যাই”।

১৯৮২

বল্মীক

মধ্যদিনে দাঁড়িয়েছো, রত্নাকর
চিনে নাও সংসার, স্বজন
বুঝে নাও হিসেবনিকেশ
পুকুরে তাকিয়ে ঢাখো
স্পর্শমাত্র সরে যায় জল,
সব জল সরে যায়, দৃশ্যমান মকরে কুমিরে
জীবন দর্শন করো।

পুণ্যের হাওয়ায় খোলে সব গ্রহি
হাওয়া দিলে গ্রহি থুলে যায়
দায়বদ্ধ/দাবীশূন্য/একই মুদ্রা/এপিঠ/ওপিঠ
থাকা/না-ই থাকা

স্মৃতি বড়ো অস্থির আলেয়া
দপ্ করে জলে উঠে মুছে যাবে
চরাচর বিস্তীর্ণ আধারে
তোমাকে নিজের মধ্যে একা করে দেবে নিরন্তর
নি-দুঃখ ধানের মতো সোনালি নিঃসৃত

বুঝি মনোযোগ চাও ? কার মন ?
কার সঙ্গে যোগ ? রত্নাকর,
কী তোমার অর্জিত সঞ্চয় ?
চিনে নাও সাদা আর কালো
অংশভাক্ কেউ নেই
এই সারাংশার ।

এবারে নির্ভার পায়ে, ঋষিপুত্র,
যুলে ফিরে এসো, ধ্যানে বোসো,
ওই ঢাখো মরা ভাল—
ঐকান্তিক পুনরুচ্চারণে
ও-ই হবে অভিরাম ।

গূঢ় মনোযোগে,
দৃশ্য থেকে স্পষ্ট মুছে দেবে
প্রচণ্ড সাষ্টাঙ্গ প্রেমে, একদিন
তোমাকে, বন্দীক । তুমি তার ক্রিয়াকর্ম
জানতেও পাবে না ।

তুমি শুধু শ্রুত হবে, অন্তঃশীল প্রাণধ্বনিবাদে
দেবতার উৎসুক শ্রবণে ঠাঁই পাবে ।

রত্নাকর, কিসের সংসার ?

পৃথিবী বাড়ুক রোজ

বিশ্ব ছোটো হয়ে যাক হস্তধৃত আমলকের মতো,
এ আমার প্রার্থনীয় নয় । আমি চাই পৃথিবী ছড়াক
আমার পৃথিবী আমি পরিভ্রম করে খুঁজে নেবো ।
পৃথিবী, বিস্তীর্ণ হও, ব্যাপ্ত হও লক্ষ্যচরাচর,
আকীর্ণ ছড়িয়ে পড়, আরও, আরও নিঃসীম সময়
আমার পৃথিবী হোক অফুরান, অনন্ত বিস্তার
পৃথিবী, বর্ধিষ্ণু হও, আমি ছোট, আরো ছোট হই ।

আমি ছোট হতে হতে একগুচ্ছ রেশমের মতো
নরম ও নিরাকার, যৎসামান্য ইশারা পেলেই
নিজেকে গুটিয়ে নিয়ে রাজপুতানী মঞ্চমলের শাড়ি—
আংটির ফোকর দিয়ে সবিনয়ে গলে চলে যাবো ।

পৃথিবী অনেক বড়ো, পৃথিবীকে ছোট হতে নেই ।

পশুপাখি উদ্ভিদেবো কিছুমাত্র বিস্মিত হবে না
ওরা সব জেনে গেছে, মানুষের বেশি দেয় নেই ।

আসাম,

তৈজসপত্তর ভাঙছে যা দিয়ে সাজানো ছিল
হুঃখীর সংসার ।

তৈজসপত্তর ভাঙছে, মস্ত বড় দালানকোঠার

কড়িবরগা ভাঙবার মতন
প্রচণ্ড আওয়াজ করে' পড়োশীর দেওয়াল কাঁপিয়ে
ভেঙে যাচ্ছে
কাচের গেলাস

কাচের গেলাস ভাঙছে এতে আর আশ্চর্য কী আছে
আশ্চর্য কেবল এই রক্তের নিনাদ
এই মত্ত আলোড়ন
ভূকম্পনের মতো নড়ে-ওঠা পায়ের জমিন্
এই রুদ্ধশ্বাস...

দুঃখীর সংসার ভাঙছে এতে আর দুঃখের কী আছে
দুঃখীর সংসারে দুঃখ নামহীন—
হৃদ মিশে যায়,
বাতাসে বাতাস আর জলশোতে জল

এতদসত্বেও, কিমাশ্চর্যমতঃপরম্ !
দোদাঁড় আওয়াজ করে' ভেঙে যায় দুঃখীর সংসার ।
বাতাসে বাতাসে কাটছে
জলে ভাসে জল...

গোপন গর্জন শুনছো ? মাটির গভীরে শব্দ ওঠে—
দুঃখ বাস্তবসাপ
এইবারে ধ্বংসবিধ ঢেলে দেবে বাক্তিশনাড়ীতে
মাতাল মায়ের গর্ভে
উঠে আসছে
পাতাল-আগুন—
তুণে তুণে কৃতান্তমুখল .

তুমি শুধু মোহনিদ্রা ভাঙো

বিশল্যকরণী নেই,

ধমনীতে রক্ত আছে, দেবো—

তুমি শুধু মোহনিদ্রা ভাঙো !

যদি অন্ধ হয়ে যাই

যদি আর এই চোখ তোমাকে না চাখে

সমস্ত পৃথিবী যদি তালাচাবি বন্ধ হয়ে যায়

আমার তা হোক—

তুমি শুধু তীত্র চক্ষু তোলো ।

যদি বধিরতা আসে, আম্বক আমাতে—

তোমার স্বরের ওই তরল আঙুনে

যদি না সৈকতে পারি বুকের পঁজর

আমার তা হোক—

তুমি শুধু তীক্ষ্ণ কান মেলো ।

আমি চুপ করে থাকি যদি চিরদিন

যদি মূক হয়ে যাই

বাকী সব কথাগুলি আজীবন রয়ে যায়

বুকের বালিতে বন্দী, অন্তঃসলিলা

আমার তা হোক—

তুমি শুধু দীপ্র মুখ খোলো ।

তুমি নেত্রপাত করলে

এ পৃথিবী পুনর্যৌবনা...

তুমি যদি কান পাতে

মন খোলে আকাশবাতাস...

তুমি উচ্চারণ করলে

শ্রবণে উৎকর্ণ হয় নদী ও পাহাড়...

আমি যদি নিদ্রামুগ্ধ, তবু হয়ে যাই
পৃথিবী গড়িয়ে পড়ে দশ আঙুলের ফাঁকে
আধো-খাওয়া আপেলের মতো
আমার তা হোক—

তুমি শুধু মোহনিদ্রা ভাঙো ।

বিশল্যকরণী নেই, ধমনীতে রক্ত আছে, দেবো—
তোমার পৃথিবী তুমি জেগে উঠে
জিহ্বা হাতে ধরো ॥

শুধু

এ কোন্ আশ্চর্য দ্বীপ
নাকি দ্বীপ নয়
মূল ভূখণ্ডের সঙ্গে বাঁধা আছে
অদৃশ্য জিজ্ঞাসে

সৈকতে ফেনার ফুল
ফেনাফুল নয়
ঘনীভূত অশ্রুর শিকল

জড়িয়েছে দশদিক্
আদিগন্ত স্থতির প্রশ্রয়
এই দ্বীপ
নাকি দ্বীপ নয়

শুধু সিন্দুর বিলম্ব
বহুকাল ভেসে আছে একা

উচ্চারণ

ওই ওঠে, ও-অধরে, বৃষ্টিমাথা এমন সঙ্কায়
ও কী উচ্চারণ করো ? থাক থাক, ও কথা কোয়ো না ।
ওসব পারি না শুনতে, দুঃখকষ্ট সকলেরি থাকে
চিনি-আলু-কেরোসিন-লোডশেডিং-ইশকুল-মাস্টার—
এ-সবই বাস্তব, কিন্তু আমি তার কী করি উপায় ?
কতকাল পরে দেখা, এ মুহূর্ত বড়ো মূল্যবান—
উদ্বেগ-উৎকর্ষা নিয়ে কথা ভাল লাগে না একদম
পশ্চিমের আলো এসে পড়েছে তোমার নগ্ন হাতে
সোনার সীতার মতো আধোখানি হয়েছেো সোনার—
প্রসঙ্গ বদল করো, এখানে কি ওকথা মানায় ?

তার চেয়ে এসো হাতে হাত রেখে দিগন্তে তাকাই
ওই ঢাখো সূর্য ডোবে লজ্জারাঙা গঙ্গার উরুতে
আকাশের নীবিবন্ধে পদ্মবীজ মালার মতন
ঝুমঝুম কাঁক বেঁধে নাম-না-জানা পাখি উড়ে যায়—
কোথায় যাত্রার শুরু কে জানে যাত্রার সারা কোথা
কী হবে ওসব ভেবে, হে আমার প্রিয়াকী রমণী,
সূর্য, নদী, বলাকার সমগোত্রা, তুমিও হৃন্দর—
তোমারও নয়নভঞ্জে স্তব্ধ ঢেউ, উড়ন্ত কাকলি ।
ওদের তো দুঃখ নেই ? তুমি কেন দুঃখ শব্দ বলো ?

এই ঢাখো পথপ্রান্তে ঘনশ্রাম শোভন বনানী
প্রান্তরের বুক ঢেকে ইতস্তত বকুলজারুল
এদেরও শ্রাবণ মাসে কোনো দুঃখ নেই ।
তোমারও যৌবন, কষ্টা, পল্লবিত, দপিত, সবুজ
তুমি ক্লান্তিহরা হও ; শ্রামচ্ছায়া, স্বপ্নিল, শীতল—
পাখিকে ছায়া দাও ।
গাছের কি ক্লান্তি আছে ? গাছ শুধু আশ্রয় সাজায় ।

তুমিও ভরুর মতো, তুমিও তুণের মতো হও ।

দুঃখ শুধু পুরুষের ক্ষত—

তুমি তাতে যৌবনের প্রলেপ লাগাও ।

যুবতী নারীর ওষ্ঠে ‘দুঃখ’ শব্দ মানায় না বস্তুতঃ
ও বড়ো কঠিন শব্দ, ওতে দাবী শুধু পুরুষের
তোমরা তো স্তব্ধ নেবে, স্তব্ধ দেবে, স্তব্ধের পসারী
সমর্থযৌবনা বরনারী

রৌদ্র জল বায়ু মাটি শূণ্যের সমান দরকারী—
সুন্দরী, মোহনবাঁশি ওষ্ঠাধর রুক্ষ অভিযোগে
গরীব দুঃখীর মতো দীনহীন বিবর্ণ কোর না,
ওই আলোচনা থাক । ওসব সংসারী শাড়ী খুলে
এখানে সন্ধ্যায় এসো পাতা, পাখি, নদীর মতন

তোমরা কবিতা হবে, তোমরাই কবির সম্পদ
অমন তীব্রতা কেন, চোখে-মুখে মেঘছায়া কই ?
দৃষ্টিতে মদিরা ঢালো,
পিপাসার্ত অঞ্জলি পেতেছে, বেলা যায়,
ওসব অপ্রিয় কথা এ সন্ধ্যায় নয় প্রিয়সখী,
গার্হস্থ্য প্রমাদগুলি কবি নয় গৃহস্থকে বোলো—
আজ শুধু স্তুতি হোক যৌবনের, শ্রাবণসন্ধ্যায়
তোমার আধখানা সোনা,
এমনই রহস্যময়ী হয়ে থাকো মৌন নীলিমায়
চোখে চোখে কথা হোক মন-গড়া দীপে,
কবিতা, এবং কবিতায় ।

ভাষান্তর

এসো, চুষন দাও,
বলো, দূরে যাবে না কখনো ।
এসো, হাতে তুলে নাও সমস্ত গোধূলি —
এখনি আঁধার নামবে,
মুছে যাবে পথ, দৃশ্যপট ।

এসো, চুষন দাও,
তারপরে বলো সেই কথা
যেই শব্দ উচ্চারণ করা সাজে তোমারি কেবল
যার সামনে রাত্রি নয়,
পড়ে আছে দিবা দ্বিপ্রহর ।

যে-কথা আমার ঠোঁট ছেড়ে গেছে বহুকাল হলো
উচ্ছিষ্ট সেই শব্দে করবো না অতিথি-সংকার,

এসো, চুষন দাও,
তারপরে শিরায় শিরায়
সেই শব্দে অগ্নিময় নৈঃশব্দের প্রতিধ্বনি তুলি
ধ্বনি, প্রতিধ্বনি তুলি অব্যক্ত বাক্যের
শ্রবণের গহনে বাজাই
শোণিতে নিহিত সংলাপ

জিহ্বা তত দীন নয়,
জিহ্বা আরো গূঢ় ভাষা জানে ।
এসো, চুষন দাও,
সেই ভাষা তোমাকে শেখাই —
জিহ্বায়, গুঠাধরে, শিরাধমনীতে
শ্রবণে যা শাস্ত্রত অধরা ।
রক্তে কলস্ররা

মুখোমুখি

হু'একটা মুখের সামনে দাঁড়াতে পারি না
মনে হয় মুখ ধোওয়া নেই
মনে হয় মুখে বুঝি ময়লা লেগে আছে

কোনো কোনো মুখ মুখ দর্পণের মত স্বচ্ছ কিনা,
দেখা যায় স্পষ্ট নিজেকেই —
নিজের চেয়েও বেশি কাছে ।

প্রভুর কুকুর

প্রভুর কুকুর হয়ে কেটে গেছে অগুন্তি বছর ।
কেবল বাতাস শুঁকে শত্রুতার গন্ধ চিনে নেওয়া

তারপর অবিশ্রান্ত যুদ্ধের হুংকার, ছুটোছুটি
শিকার কামড়ে এনে শ্রীচরণে নম্র নিবেদন
অতঃপর লেজ নেড়ে পদতল চেটে
বকশিশের অস্থিখণ্ড মুখে ধরে চুষির মতন
তৃপ্ত হয়ে-পড়া । এইভাবে ক্লান্তিহীন অগুন্তি বছর
প্রভুর আদর ।

এখন যৌবন গত । ভূতগ্রস্ত একক শিকারী
সারারাত্রি চতুর্দিকে দুনিবার শত্রুশব্দ শোনে —
জানালা-দরজায় টোকা, মেঝেয় কি ছাদে
দেওয়ালে দেওয়ালে শোনে পদশব্দ —
নিশ্বাসের বাতাসটুকুও, আকাশ, প্রান্তর, বনমালা
কদাচ শত্রুর বিষবাপ্পমুক্ত নয় ।

সারাদিন ক্লান্ত, দীন, কেটে যায় আচ্ছন্ন নিদ্রায়
রাত্রিভোর অশরীরী পশ্চাদ্ধাবনা
অন্তহীন সীমার লড়াই ।

আকণ্ঠ চীৎকৃত কান্না,
শূন্যভেদী বিলোল ঝিকার ।
বহুকাল প্রভুহীন, বহুকাল পথের কুকুর ।

বহুকাল, নিজেই শিকার ।

স্মৃতিরাজ

স্মৃতিরাজ, আমার আর ইচ্ছাশর্তে পতন হল না ।
তিনি বাড়ালেন তাঁর অমোঘ অঙ্গুলি
তিনি বাড়ালেন হাত
স্পর্শ মাত্রে দাউ দাউ জ্বলে গেল সমস্ত শূন্যতা
পাদতলে জল হয়ে গেল
মৃত্তিকার সৃষ্টি হল, সূর্যের শাসনে
মাথার উপরে এল মহাকাশ ।
তিনি বললেন, যদি পড়তে হয়
যতো নিচে পড়ে
জ্বলে কি আকাশে কাঁপ দাও
শেষদিনে মৃত্তিকার
স্নেহস্পর্শে চিরক্ষমা পাবে ।

উন্টো-সোজা

“এতো ঢাকঢাক-গুড়গুড়ের আছেটা কি মশাই
ভগ্নামি ছেড়ে যা বলার তা
সোজাসুজি বনুন ।”

—“দেখুন, জীবনটা সোজা নয়
জীবনে কিছুই সোজা যায় না

এমন কি হাত থেকে ঢিলটা ছুঁড়লেও
 সেটা প্যারালাল হয়ে বঁকে পড়ে ।
 একটা গাছ, সেও সূর্যের দিকে
 প্রথমেই সিধে ওঠে না, গোড়ায় একটু আঁকেবঁাকে
 তাল নারকোল খেজুর টেকুর দু-একখানা
 পামজাতীয় একলসেঁড়ে উচ্চাকাঙ্ক্ষী
 উদ্ভিদ ভিন্ন । কিন্তু
 তাদের শেকড়গুলো নেড়ে চেড়ে দেখেছেন কি ?
 বলুন তো মাটির নিচে গিয়ে
 তাদের সোজাসুজির জারিজুরি খাটে কিনা ?
 উহু, সেখানে তেনাদের ভেন্ন মূর্তি !
 নদীর কথা বাদই দিচ্ছি—
 এই আপনাদের মহদাশয় সমুদ্রের কথাটাই ধরুন,
 একখানা ঢেউও কি সে সিধে পাঠায় ?
 আর এই যে পূজ্যপাদ হিমালয়
 তাঁর কোন্‌খানটা সোজা মশাই ?
 তুচ্ছ বাতাস, ঈশ্বরের ফুঁ—
 সেও খুব সোজা ধায় কি,
 ক্ষণে ক্ষণে দিক্‌ পালটায় ।
 আমি সামান্য মানুষ
 আমি কি করে সোজা বলব,
 সোজা চলব ? হাঁটতে গেলেই
 ডান পাটা একটু ডাইনে হেলে পড়ে
 বাঁ পা-খানা বাঁয়ে হেলে যায়
 সেই ছেলেবেলা থেকে
 ঢের চেষ্টা করে দেখেছি মশাই
 কিছুতেই নাকের সোজা হাঁটতে পারিনি ।
 একে কি আপনি ভগ্নামি বলবেন ?
 আমাকে কি বলবেন
 দুমুখো সাপ ?

দেখুন দাদা

দুটো জিনিস কেবল সোজাসুজি চলে :

— আকাশ ফুঁড়ে বিষ্টি,

— আর চক্ষু ফুঁড়ে জল ।

আর, একখানা কথাই কেবল

সোজাসুজি বলা যায় :

— মিথ্যে ।”

বিকেলবেলার গান

তোমার নামের প্রভা জ্যোতির্ময় করেছে বিকেল
চিকন হাসির মধ্যে মখমলের বিছানা পেতেছো
বিকেলবেলার গান বাজিয়ে দিয়েছো হুঁই চোখে
নহবতখানার মতো, ভেসে যায় দূরান্তে সে স্বর
এইবারে ফুল চাই এ বিকেল ফুলের বিকেল
তারার ফুলে উঠবে আকাশবাগানে কান্তিময়
উধাও স্নগন্ধ হয়ে ঝেঁপে আসবে মৃদুল আঁধার
আলোফুল ঝরে পড়বে চোখের শয্যায় স্বকোমল
তারার স্বরভি ঠিক হৃদয়বিভার মতো চিকন চিকণ
মিশে যাবে হাসির মখমলে

অঞ্জলিতে ধরে আছি বিকেলবেলার স্নখ
দুধ দুধ কবোফ চড়ুই, নরম, জীবন্ত, পক্ষধর
আন্‌চান্‌ অস্থির প্রহর
বিকেল বেলায় গানে, নক্ষত্রস্ববাসে, থরথর
রাজি নেমে আসে
অঞ্জলিবন্ধনে কাঁপে প্রহরের ডানার উড়াল
একটুও আনমনা হলে আঙুলের শিক ভেঙে
লক্ষ্যহীন শূন্যে উড়ে যাবে—

অৰ্ধশুট অঞ্জলিতে পড়ে থাকবে উষ্ণ শিহরণ
অনিঃশেষ প্রার্থনার মতন আপসোস ।

তাই রুদ্ধশ্বাস, তাই এমন উদ্‌গ্ৰীব,
তৃপ্তিহীন, একাগ্র রয়েছি ।

আমলকী শিমুল

যেতে যেতে হঠাৎ কখনো

ট্রেন থেকে নেমে যাবো ধূপছায়া আমলকী আধারে

পথের ছ'ধারে শুধু চন্দ্রকান্ত মণির মতন

জোছনা-গলা আমলকীর ফল

ঝুমঝুম মজার হাওয়া ।

চুষনের প্রতিধ্বনি ভেঙে দেবে অরণ্যের ঘুম

চমকিত ডানা মেলে আমলকী বনের ময়ূর

আধো-খাওয়া ফল ছেড়ে উড়ে যাবে অযোধ্যা পাহাড়ে

আমলকীর বন থেকে পথ যাবে শিমুলতলায় ।

সময় হয়েছে বুঝে হঠাৎ না-বলে

ট্রেন থেকে নেমে যাবো প্রস্তুতিবিহীন ।

টুপ করে ঝ'রে যাবো প্রতীক্ষায় সবুজ মাটিতে

স্নেহে শুভ্র আমলকীর ফলের মতন —

অথবা, কে জানে, হয়তো রক্তারক্তি, বিচ্যুত শিমুলে ।

সুন্দরবন

ওরা ভাবছে চুলের বনে হাঁক দিয়েছে রুপুলি বাঘ
ওরা ভাবছে রূপ ভেঙেছে এবার কেবল রূপোরই হাঁক
এবার বুঝি অন্ন স্বপাক । ওরা জানে না ।

ওরা কি জানে, রূপের নীচে লুকিয়ে আছে আরেকটা রূপ
সেই রূপটাই জ্যাক্ত ভীষণ হেঁতালপাতার মধ্যে যেমন
ঘাপ্‌টি মাঝা বাঘের ডোরা । চলতে ফিরতে প্রাণের তলায়
আড়াল থেকে আলতো কাঁপায়, আছড়ে মারে,
বাড় ভেঙে দেয় আরেকটা প্রাণ, কি দুর্দান্ত !
বাইন গাছের ডালকে যেমন আঁকড়ে ঝোলে মোমাছিচাক, মধু বেবাক্

বিষের জালা সহিতে পারলে / ধৈর্য ধরে
রইতে পারলে / আপনি তোমার মধুর হাঁড়ি
ভর্তি হবে । ওরা কি জানে, মহাল ভাঙা ?
ওরা জানে না ।
চুলের মধ্যে রুপুলি হাঁক বুকের মধ্যে সোনালি চাক
রূপটা কেবল বাইরে থেকে ভেতরে যায়,
রূপ ভাঙে না । ওরা জানে না ।

খাঁড়ির জলে ভর্তি কামট, দাঁত ধারালো
ও-জলে হাত দিও না, পা দিও না, স্নান করো না
ও-জলে মরণ-কামড় কামট ভরা, হেই সামালো—

কিন্তু তোমায় নৌকো তাতেই বাইতে হবে, হেইও হোঃ
ভাটার টানে সেই জলেতেই ‘আল্লা’ বলে
প্রাণের দায়ে কাঁপ দিয়ে গুণ টানতে হবে, হেইও হোঃ
না জানে তো এসব খবর ওদের এবার জানতে হবে, হেইও হোঃ ।

নীল দানিয়ুব

নীল দানিয়ুব এসো, শোবে এই উপত্যকায় ?
গাঙ্গেয় পলির বুকে এই ঢাখো বুদা পাহাড়ের
সমস্ত প্রস্তুত, শিলা, উদ্ভিদ সকল, ফল-ফুল, বনজ প্রাণীরা
নিশ্চিন্তে ঘুমায় ।

নীল দানিয়ুব, এসো, পেতে দেবো দৃপ্ত হিমালয়
বুদা পাহাড়ের চেয়ে স্মহৎ উপত্যকায়
তুমি স্থায়ী রয়ে যাবে ।

নীল দানিয়ুব, এসো, ছিঁড়ে ফেলো সেতুর মালিকা
স্নাইস গেটের সব মিথ্যে প্রতারণা ভেঙে ফেলে
ফুলে ওঠো, ফুঁসে ওঠো, প্রচণ্ড বতায় —

এইসব ধানজমি, এইসব গম, ভুট্টাশ্বেত
অফলা, নিফলা, ঢাখো, কতকাল । প্রচণ্ড খরায়
এইসব সাজানো বাগান ঝরে যায় —

নীল দানিয়ুব, আয়, বঙ্গোপসাগরে তোর ঘর বেঁধে দেবো
মার্গিট সীগার্ট দ্বীপ হয়ে যাবে গঙ্গায় ব-দ্বীপ
জলের গভীরে কোনো হাহাকার, ঘৃণি জাগবে না —

নীল দানিয়ুব এসো, একবার সাহস করে শুধু
হিন্দুকুশ পার হয়ে চলে এসো সিন্ধুর পাড়ায় ।
তারপর গঙ্গা খুব কাছে ।

ম্যাজিক ওয়ালা

কেউ যে কখনো কাউকে রূপনারায়ণ
দেখাবে, এটাতে আর আশ্চর্য কি আছে
কেউ তো কখনো কাউকে রূপনারায়ণ
দেখাবেই যতদিন পৃথিবীতে রূপনারায়ণ
এমন নামের কোনো মুক্ত নদ আছে

কেউ যে কখনও কাউকে মেঘ-হেঁড়া আলো
দেখাবে, এটাতে আর আশ্চর্য কি আছে
কেউ তো কখনো কাউকে মেঘ-হেঁড়া আলো
দেখাবেই যতকাল ত্রিভুবনে মেঘ-হেঁড়া আলো
এমন নামের কোনো ঐশ্বরিক ইন্দ্রজাল আছে

তুমি যে সবার আলো সমস্ত ম্যাজিক
একাই দেখিয়ে গেছো, অবাক আমাকে—
রূপনারায়ণের কূলে সেই থেকে জেগে বসে আছি
একা একা খেলা করি মেঘ-হেঁড়া আলোর প্রবাসে

দেবতার কাল

১

রোদনাদতিনিঃস্বাসাদ্ ভূমিসংস্পর্শনাদপি
ন ভাং দেবীমহং মন্ত্ৰে...হৃন্দর ৩৩ ১০

রাজঃ সংজ্ঞাবধারণাং

দীর্ঘশ্বাস, ভূমিস্পর্শ, অশ্রুবিমোচন—

এ-সকল দেবোচিত নয় ।

শুধু স্মিতহাস্য, শুধু শূন্তে রাখা কমলা চরণ,

বিনাস্বাসে বেঁচে থাকা ।

শোক কি বিষয়,
হে ঈশ্বর, দেবোচিত নয় ।

মুছে যাক রাজচিহ্ন, লুপ্ত হোক পাখির লক্ষণ,
নামুক প্রলয় —
আত্মরূপ আত্মক অরণ —
সূর্য ঢেকে মেলে দাও গরুড়ের পাখা,
ঝরাক অগ্নি তৃতীয় নয়ন,
এখন সময় ।

২

I am fire, and air ; my other elements
I give to baser life.

অ্যান্টনি অ্যাণ্ড ক্রিগপেট্রা

জলে স্থলে কাজ নেই । —
থাক শুধু তেজ, মরুৎ, ব্যোম ।
মুছে যাক স্তন, কটি, কটাক্ষ, কুন্তল —
মুছে যাক হাসি, অশ্রুজল
লুপ্ত হোক তোর জল স্থল —
আমার আকাশ থাকবেই ।

